

二



0 90382

序

張中丞集始編於明青田令厲雪庵江右副使陳幼學復參唐忠臣錄完節錄二書重訂之原載遺著暨各代祀典文辭外多無錫靈應諸蹟邑人感頌之筆頗未醇善余己亥冬月督濬京口運河於中丞廟得是書鈔本病其譌舛未及校正今夏從軍海外攜置行篋秋間夷寇退去軍務稍暇乃爲增損校訂用付梓氏竊以中丞遺著僅表判三首詩二首餘皆後代記述文辭不得謂爲中丞集也因易其名曰張中丞事實集錄擇言之尤雅者存之其一切不經之說概從刪棄所以明此書爲

張中丞事實集錄

序

一

表彰忠烈而作不使神異之說累著述體例也運河中丞廟俗名都天見江南通志蓋亦由死爲厲鬼殺賊一語附會沿稱宜易額曰唐中丞張忠靖王廟於唐官宋贈爲順劄旣成因併書寄京口人士云道光庚子九月後學王德茂識

張中丞事實集錄

光山王德茂編

卷首

舊唐書本傳

新唐書本傳

通鑑綱目

卷上

遺著

詔

表

書後

論

序

祭文

記

碑

卷中

賦

樂章

詩

詩餘

卷下

張中丞事實集錄

目錄

識餘

附錄

補遺

卷中

祭文

頌

碑

歌

編

表

書後

論

序

卷上

善書本傳

神書本傳

嚴鑑縣目

卷首

光山王德茂編

張中丞事實集錄

張中丞事實集錄卷首

光山王德茂編

元和陸嵩校

舊唐書本傳

張巡蒲州河東人兄曉開元中監察御史兄弟皆以文
行知名巡聰悟有才幹舉進士三以書判拔萃入等天
寶中調授清河令有能名重義尚氣節人以危窘告者
必傾財以恤之祿山之亂巡爲真源令說譙郡太守令
完城募市人爲拒賊之勢時吳王祇爲靈昌太守奉詔
糾率河南諸郡練兵以拒逆黨濟南太守李隨副之巡
與單父尉賈贲各召募豪傑同爲義舉時雍邱令令狐
潮欲以其城降賊民吏百餘人不從命潮皆反接仆之
於地將斬之會賊來攻城潮遽出鬪而反接者自解其
縛閉城門拒潮召贲贲與巡引衆入雍邱殺潮妻子嬰
城守備吳王祇承制授贲監察御史數日賊來攻城贲
出鬪而死巡乃合贲之眾城守令狐潮引賊將李廷望
攻圍累月賊傷夷大半祿山乃於雍邱北置杞州築城
壘以絕餉路自是內外隔絕又相持累月賊烽轉熾城
中益困時許遠爲睢陽守與城父令姚闓同守睢陽城
賊攻之不下初祿山陷河洛許叔冀守靈昌薛愿守穎

張中丞事實集錄

卷首

川許遠守睢陽皆城孤無援愿守一年而城陷叔冀一年而自拔獨睢陽堅守賊將尹子奇攻圍經年巡以雍

邱小邑諸備不足大寇臨之必難保守乃列卒結陣詐

疑有闕文

至德二年正月也元宗聞而壯之授巡主客郎

中兼御史中丞尹子奇攻圍既久城中糧盡易子而食析骸而爨人心危恐慮將有變巡乃出其妾對三軍殺之以饗軍士曰諸公爲國家戮力守城一心無二經年乏食忠義不衰巡不能自割肌膚以啖將士豈可惜此婦人坐視危迫將士皆泣下不忍食巡強令食之乃括城中婦人既盡以男夫老小繼之所食人口二三萬人

張中丞事實集錄

卷首

二

心終不離變時賀蘭進明以重兵守臨淮巡遣帳下之士南霽雲夜縋出城求援於進明進明日與諸將張樂高會無出師意霽雲泣告之曰本州強寇凌逼重圍半年食盡兵窮計無從出初圍城之日城中數萬口今婦人老幼相食殆盡張中丞殺愛妾以啖軍人今見存之數不過數千城中之人分當餌賊但睢陽旣拔卽及臨淮皮毛相依理須援助霽雲所以冒賊鋒刃匍匐乞師謂大夫深念危亡言發響應何得宴安自處殊無救恤之心夫忠臣義士之所爲豈宜如此霽雲旣不能達主將之意請嚙一指畱於大夫示之以信歸報本州霽雲

自臨淮還睢陽繩城而入城中將吏知救不至慟哭累
日十月城陷巡與姚閻南霽雲許遠皆爲賊所執巡神
氣慷慨每與賊戰大呼誓師皆裂血流齒牙皆碎城將
陷西向再拜曰臣智勇俱竭不能成遏強寇保守孤城
臣雖爲鬼誓與賊爲厲以答明恩及城陷尹子奇謂巡
曰聞君每戰皆裂嚼齒皆碎何至此耶巡曰吾欲氣吞
逆賊但力不遂耳子奇以大刀剔巡口視其齒存者不
過三數巡大罵曰我爲君父義死爾附逆賊犬豕也安
能久哉子奇義其言將禮之左右曰此人守義必不爲
我用素得士心不可久畱是日與姚閻霽雲同被害惟

張中丞事實集錄

卷首

三

許遠執送洛陽 姚閻者澧州平陸人故相梁國公崇
之姪孫父弁開元初歷處州刺史閻性豪蕩好飲謔善
絲竹歷壽安尉城父令與張巡素相親善以守睢陽之
功至德二年春加檢校尙書侍郎 賈賁者故閩州刺
史璿之子也 許遠者杭州鹽官人也世仕江右曾祖
高陽公敬宗龍朔中宰相自有傳遠清幹初從軍河西
爲磧西支度判官章仇兼瓊鎮劍南又辟爲從事募其
門欲以子妻之遠辭兼瓊怒積他事中傷貶爲高要尉
後遇赦得還祿山之亂不次拔將帥或薦遠素練戎事
元宗召見拜睢陽太守累加侍御史本州防禦使及賊

將尹子奇攻圍遠與張巡姚嬰城拒守經年外救不至兵糧俱盡而城陷尹子奇執送洛陽與哥舒翰程千里俱囚之客省及安慶緒敗渡河北走使嚴莊皆害之初賀蘭進明與房瑄素不相叶及瑄爲宰相進明時爲御史大夫瑄奏用進明爲彭城太守河南節度使兼御史大夫代號王巨復用靈昌太守許叔冀爲進明都知兵馬使亦兼御史大夫重其官以挫進明號王巨受代之時盡將部曲而行所畱者揀退羸兵數千人劣馬數百匹不堪捍賊叔冀侍部下精銳又名位等於進明自謂匹敵不受進明節制故南霽雲乞師進明不敢分兵懼叔冀見襲兩相觀望坐視危亡致河南郡邑爲墟由執政之乖經制也

附舊唐書張鎬傳

節錄

帝以鎬有文武才業命兼河南節度使持節都統淮南等道諸軍事鎬旣發會張巡宋州圍急倍道兼進傳檄亳州刺史閆邱曉引兵出救曉素懷戾馭下少恩好獨任已及鎬信至略無稟命又慮兵敗禍及於已遂逗遛不進鎬至淮口宋州已陷鎬怒曉卽杖殺之

附舊唐書程千里傳

節錄

至德二年十二月上御丹鳳樓大赦節文曰忠臣事君

有死無貳烈士徇義雖歿如存其李愷盧奕袁履謙張
巡許遠張介然蔣清龐堅等卽與追贈訪其子孫厚其
官爵家口深加優恤

新唐書本傳

張巡字巡鄧州南陽人博通羣書曉戰陣法氣志高邁
略細節所交必大人長者不與庸俗合時人叵知也開
元末擢進士第時兄曉已位監察御史皆以名稱重一
時巡由太子通事舍人出爲清河令治績最而負節義
或以困阨歸者傾貲賑護無吝秩滿還都於是楊國忠
方專國權勢可炙或勸一見且顯用答曰是方爲國怪

張中丞事實集錄

卷首

五

祥朝宦不可爲也更調眞源令土多豪猾大吏華南金
樹威恣肆邑中語曰南金口明府手下巡下車以法誅之
赦餘黨莫不改行遷善政簡約民甚宜之安祿山反天
寶十五載正月賊酋張通晤陷宋曹等州譙郡太守楊
萬石降賊逼巡爲長史使西迎賊軍巡率吏哭立元皇
帝祠遂起兵討賊從者千餘初靈昌太守嗣吳王祇受
詔合河南兵拒祿山有單父尉賈賁者閬州刺史璿之
子率吏稱吳王兵擊宋州通晤走襄邑爲頓邱令盧諶
所殺賁引軍進至雍邱巡與之合有衆二千是時雍邱
令令狐潮舉縣附賊遂自將東敗淮陽兵虜其衆反接

在廷將殺之暫出行部淮陽囚更解縛起殺守者迎賁等入潮不得歸巡乃屠其妻子磔城上祇聞承制拜賁監察御史潮怨賁還攻雍邱賁趨門爲衆躡死巡馳騎決戰身被創不顧士乃奉巡主軍間道表諸朝騰牋祇府祇乃舉堯以東委巡經畧潮以賊衆四萬薄城人大恐巡諭諸將曰賊知城中虛實有輕我心今出不意可驚而潰也乘之勢必折諸將曰善巡乃分千人乘城以數隊出身前驅直薄潮軍軍卻明日賊攻城設百樓巡柵城上束芻灌膏以焚焉賊不敢向巡伺隙擊之積六旬大小數百戰士帶甲食裹瘡鬪潮遂敗走追之幾獲

潮怒復率衆來然素善巡至城下情語巡曰本朝危蹙兵不能出關天下事去矣足下以羸兵守危堞忠無所立盍相從以苟富貴乎巡曰古者父死於君義不報子乃銜妻孥怨假力於賊以相圖吾見君頭於通衢爲百世笑奈何潮赧然去當此時王命不復通大將六人白巡以勢不敵且上存亡莫知不如降六人者皆官開府特進巡陽許諾明日堂上設天子畫像率軍士朝人人盡泣巡引六將至責以大誼斬之士心益勸會糧乏潮餉賊鹽米數百艘且至巡夜壁城南潮悉軍來拒巡遣勇士銜枚濱河取鹽米千斛焚其餘而還城中矢盡巡

縛藁爲人千餘被黑衣夜縋城下潮兵爭射之久乃藁人還得箭數十萬其後復夜縋人賊笑不設備乃以死士五百斫潮營軍大亂焚壘幕追奔十餘里賊慙益兵圍之薪水竭巡給潮欲引眾走請退軍二舍使我逸潮不知其謀許之遂空城四出三十里撤屋發木而還爲備潮怒圍復合巡徐謂潮曰君須此城歸馬三十四我得馬且出奔請君取城以藉口潮歸馬巡悉以給驍將約曰賊至人取一將明日潮責巡不去答曰吾欲去將士不從奈何潮怒欲戰陣未成三十騎突出禽將十四斬百餘級取其器械牛馬潮遁還陳畱不復出七月潮

率賊將瞿伯玉攻城遣僞使者四人傳賊命招巡巡斬以徇餘繫送祇所圍凡四月賊常數萬而巡衆纔千餘每戰輒克於是河南節度使嗣虢王巨屯彭城假巡先鋒俄而魯東平陷賊濟陰太守高承義舉郡叛巨引兵東走臨淮賊將楊朝宗謀趨寧陵絕巡餉路巡外失巨依拔衆保寧陵馬裁三百兵三千至睢陽與太守許遠城父令姚闓等合乃遣將雷萬春南霽雲等領兵戰寧陵北斬賊將二十殺萬餘人投尸於汴水爲不流朝宗夜去有詔拜巡主客郎中副河南節度使巡籍將士有功者請於巨巨纔授折衝果毅巡諫曰宗社尙危園陵

孤外渠可吝賞與貲巨不聽至德二載祿山死慶緒遣
其下尹子琦將同羅突厥奚勁兵與朝宗合凡十餘萬
攻睢陽巡勵士固守日中二十戰氣不衰遠自以材不
及巡請稟軍事而居其下巡受不辭遠專治軍糧戰具
前此遠將李滔救東平遂叛入賊大將田秀榮潛與通
或以告遠曰晨出戰以碧帽爲識視之如言盡覆其衆
還輒曰我誘之也請以精騎往易錦帽遠以告巡巡召
登城讓之斬首示賊因出薄戰子琦敗獲車馬牛羊悉
分士秋毫無入其家有詔拜巡御史中丞遠侍御史閻
吏部郎中巡欲乘勝擊陳雷子琦聞復圍城巡語其下

張中丞事實集錄

卷首

八

曰吾蒙上恩賊若復來止有死耳諸君雖捐軀而賞不
直勳以此痛恨聞者感慨乃椎牛大饗悉軍戰賊望兵
少大笑巡遠親鼓之賊潰追北數十里其五月賊刈麥
乃濟師巡夜鳴鼓嚴隊若將出賊申警俄息鼓賊覘城
上兵休乃弛備巡使南霽雲等開門徑抵子琦所斬將
拔旗有大酋被甲引拓羯千騎麾幟乘城招巡巡陰縋
勇士數十人墮中持鉤陷刀彊弩約曰聞鼓聲而奮酋
恃衆不爲備城上謀伏發禽之弩注矢外向救兵不能
前俄而絕士復登陴賊皆愕眙乃按甲不出巡欲射子
琦莫能辨因剡蒿爲矢中者喜謂巡矢盡走白子琦乃

得其狀使霽雲射一發中左目賊還七月復圍城初睢陽穀六萬斛可支一歲而巨發其半餽濮陽濟陰遠固爭不聽濟陰得糧卽叛至是食盡士日賦米一勺斨木皮鬻紙而食才千餘人皆羸劣不能穀救兵不至賊知之以雲衝傅堞巡出鉤干拄之使不得進篝火焚梯賊以鉤車木馬進巡輒破碎之賊服共機不復攻穿壕立柵以守巡士多餓死者皆瘡傷氣乏巡出愛妾曰諸君經年乏食而忠義不少衰吾恨不割肌以啖衆寧惜一妾而坐視士饑乃殺以大饗坐者皆泣巡彊令食之遠亦殺奴僮以哺卒至羅雀掘鼠煮鐵弩以食賊將李懷忠過城下巡問君事胡幾何曰二期巡曰君祖父官乎曰然君世受官食天子粟奈何從賊關弓與我確懷忠曰不然我昔爲將數死戰竟沒賊此殆天也巡曰自古悖逆終夷滅一日事平君父母妻子竝誅何忍爲此懷忠掩涕去俄率其黨數十人降巡前後說降賊將甚多皆得其死力御史大夫賀蘭進明代巨節度屯臨淮許叔冀尙衡次彭城皆觀望莫肯救巡使霽雲如叔冀請師不應遣布數千端霽雲嫚罵馬上請決死鬪叔冀不敢應巡復遣如臨淮告急引精騎三十冒圍出賊衆萬人遮之霽雲左右射皆披靡旣見進明進明曰睢陽

存亡已決兵出何益霽雲曰城或未下如已亡請以死謝大夫叔翼者進明麾下也房琯本以牽制進明亦兼御史大夫勢相埒而兵精進明懼師出且見襲又忌巡聲威恐成功初無出師意又愛霽雲壯士欲畱之爲大饗樂作霽雲泣曰昨出睢陽時將士不粒食已彌月今大夫兵不出而廣設聲樂霽雲義不忍獨享雖食弗下咽今主將之命不達霽雲請置一指以示信歸報中丞也因拔佩刀斷指一坐大驚爲出涕卒不食去抽矢回射佛寺浮圖矢著輒曰吾破賊還必滅賀蘭此矢所以志也至真源李贲遺馬百匹次寧陵得城使廉坦兵三千夜冒圍入賊覺拒之且戰且引兵多死所至才千人方大霧巡聞戰聲曰此霽雲等聲也乃啟門驅賊牛數百入將士相持泣賊知援絕圍益急衆議東奔巡遠議以睢陽江淮保障也若棄之賊乘勢鼓而南江淮必亡且帥飢衆行必不達十月癸丑賊攻城士病不能戰巡西向拜曰孤城備竭弗能全臣生不報陛下死爲鬼以癘賊城遂陷與遠俱執巡衆見之起且哭巡曰安之勿怖死乃命也衆不能仰視子琦謂巡曰聞公督戰大呼輒背裂血面齧齒皆碎何至是答曰吾欲氣吞逆賊顧力屈耳子琦怒以刀抉其口齒存者三四巡罵曰我爲

君父死爾附賊乃犬彘也安得久子琦服其節將釋之
或曰彼守義者烏肯爲我用且得衆心不可畱乃以刃
脅降巡不屈又降霽雲未應巡呼曰南八男兒死爾不
可爲不義屈霽雲笑曰欲將有爲也公知我者敢不死
亦不肯降乃與姚鼐雷萬春等三十六人遇害巡年四
十九初子琦議生致一人慶緒所或曰用力拒守者巡
也乃送遠洛陽至偃師亦以不屈死巨之走臨淮巡有
姊嫁陸氏遮王勸勿行不納賜百緡弗受爲巡補縫行
間軍中號陸家姑先巡被害巡長七尺鬚髯每怒盡張
讀書不過三復終身不忘爲文章不立稟守睢陽士卒

居人一見問姓名其後無不識更潮及子琦大小四百
戰斬將三百卒十餘萬其用兵未嘗依古法勒大將教
戰各出其意或問之答曰古者人情敦樸故軍有左右
前後大將居中三軍望之以齊進退今胡人務馳突雲
合烏散變態百出故吾止使兵識將意將識士情上下
相習人自爲戰爾其械甲取之於敵未嘗自修每戰不
親臨行陣有退者巡已立其所謂曰我不去此爲我決
戰士感其誠皆一當百待人無所疑賞罰信與衆共甘
苦寒暑雖斲養必整衣見之下爭致死力故能以少擊
衆未嘗敗被圍久初殺馬食旣盡而及婦人老弱凡食

三萬口人知將死而莫有畔者城破遺民止四百而已
始肅宗詔中書侍郎張鎬代進明節度河南率浙東李
希言浙西司空襲禮淮南高適青州鄧景山四節度犄
角救睢陽巡亡三日而鎬至十日而廣平王收東京鎬
命中書舍人蕭昕誅其行時議者或謂巡始守睢陽衆
六萬旣糧盡不持滿按隊出再生之路與夫食人寧若
全人於是張澹李紆董南史張建封樊晃朱巨川李翰
咸謂巡蔽遮江淮沮賊勢天下不亡其功也翰等皆有
名士由是天下無異言天子下詔贈巡揚州大都督遠
荊州大都督霽雲開府儀同三司再贈揚州大都督竝

張中丞事實集錄

卷首

七

寵其子孫睢陽雍邱賜徭稅三年巡子亞夫拜金吾大
將軍遠子致葵州司馬皆立廟睢陽歲時致祭德宗差
次至德以來將相功效尤著者以顏杲卿袁履謙盧奕
及巡遠霽雲爲上又贈姚閭潞州大都督官一子貞元
中復官巡他子去疾遠子峴贈巡妻申國夫人賜帛百
自是訖僖宗求忠臣後無不及三人者大中時圖巡遠
霽雲像於凌煙閣睢陽至今祠享號雙廟云許遠者
右相敬宗曾孫寬厚長者明吏治初客河西章仇兼瓊
辟署劍南府欲以子妻之固辭兼瓊怒以事劾貶高要
尉更赦還會祿山反或薦遠於元宗召拜睢陽太守遠

與巡同年生而長故巡呼爲兄大歷中巡子去疾上書曰孽胡南侵父巡與睢陽太守遠各守一面城陷賊所入自遠分尹子琦分郡部曲各一方巡及將校三十餘皆割心剖肌慘毒備盡而遠與麾下無傷巡臨命歎曰嗟乎人有可恨者賊曰公恨我乎答曰恨遠心不可得誤國家事若死有知當不赦於地下故遠心向背梁宋人皆知之使國威喪衄巡功業墮敗則遠與臣不共戴天請追奪官爵以刷冤恥詔下尙書省使去疾與許峴及百官議皆以去疾證狀最明者城陷而遠獨生也且遠本守睢陽凡屠城以生致主將爲功則後巡死不足惑若曰後死者與賊其先巡死者謂巡當叛可乎當此時去疾尙幼事未詳知且艱難以來忠烈未有先二人者事載簡書若曰星不可妄輕重議乃罷然議者紛紜不齊元和時韓愈讀李翰所爲巡傳以爲闕遠事非是其言曰二人者守死成名先後異耳二家子弟材下不能通知其父志使世疑遠畏死而服賊遠誠畏死何苦守尺寸地食其所愛之肉抗不降乎且見援不至人相食而猶守雖甚愚亦知必死矣然遠之不畏死甚明又言城陷自所守此與兒童之見無異且人之將死其臟腑必有先受病引繩而絕之其絕必有處今從而尤之

亦不達於理矣愈於褒貶尤慎故著之魏南霽雲者魏州頓邱人少微賤爲人操舟祿山反鉅野尉張沼起兵討賊拔以爲將尙衡擊汴州賊李廷望以爲先鋒遣至睢陽與張巡計事退謂人曰張公開心待人眞吾所事也遂畱巡所巡固勸歸不去衡賫金帛迎霽雲謝不受乃事巡巡厚加禮始被圍築臺募萬死一生者數日無敢應俄有暗鳴而來者乃霽雲也巡對泣下霽雲善騎射見賊百步內乃發無不應弦斃子承嗣歷涪州刺史劉闢叛以無備謫永州 雷萬春者不詳所來事巡爲偏將令狐潮圍雍邱萬春立城上與潮語伏弩發六矢

張中丞事實集錄

卷首

十四

著面萬春不動潮疑刻木人謀得其實乃大驚遙謂巡曰向見雷將軍知君之令嚴矣潮壁雍邱北謀襲襄邑寧陵巡使萬春引騎四百壓潮先爲賊所包巡突其圍大破賊潮遁去萬春將兵方畧不及霽雲而彊毅用命每戰巡任之與霽雲鈞 姚閻者開元宰相崇從孫父弇楚州刺史閻性豪蕩好飲譁善絲竹歷壽安尉素善巡及爲城父令遂同守睢陽累加東平太守巡之遣霽雲萬春敗賊於寧陵也別將二十有五石承平李辭陸元鍾朱珪朱若虛楊振威耿慶禮馬日升張惟清廉坦張重孫景趨趙連城王森喬紹俊張恭默祝忠李嘉隱

翟良輔孫廷皎馮顏其後皆死巡難四人逸其姓名
贊曰張巡許遠可謂烈丈夫矣以疲卒數萬嬰孤墉抗
方張不制之虜鯁其喉牙使不得搏食東南牽掣首尾
廝潰梁宋間大小數百戰雖力盡乃死而唐全得江淮
財用以濟中興引利償害以百易萬可矣巡先死不爲
遽遠後死不爲屈巡死三日而救至十日而賊亡天以
完節付二人畀名無窮不待畱生而後顯也惟宋三葉
章聖皇帝東巡過其廟畱駕裴回咨巡等雄挺盡節異
代著金石刻贊明厥忠與夷齊餓踣西山孔子稱仁何
以異云

張中丞事實集錄

卷首

十五

通鑑綱目

唐元宗天寶十五載肅宗至德元載正月以李隨爲河南節度
使許遠爲睢陽太守

二月真源令張巡起兵雍邱討賊

先是譙郡太守楊萬石以郡降安祿山逼真源令張
巡爲長史使西迎賊巡至真源帥吏民哭立元皇帝
廟起兵討賊樂從者數千人巡選精兵千人西至雍
邱與賈賁合初雍邱令令狐潮以縣降賊引精兵攻
雍邱賁出戰敗死巡力戰却賊因兼領賁衆潮復與
賊將李懷仙等四萬餘衆奄至城下衆懼巡曰賊兵

精銳有輕我心今出其不意擊之彼必驚潰賊勢小折然後城可守也乃使千人乘城自帥千人分數隊開門突出巡身先士卒直衝賊陣人馬辟易賊遂退明日復進蟻附攻城巡束藁灌脂焚而投之賊不得上積六十餘日大小三百餘戰帶甲而食裹瘡復戰賊遂敗走巡乘勝追之獲胡兵二千人而還軍聲大振

秋七月令狐潮圍雍邱張巡擊走之

令狐潮攻雍邱潮與巡有舊於城下相勞苦如平生潮因說巡曰天下事去矣足下堅守危城欲誰爲乎

張中丞事實集錄

卷首

七

巡曰足下生平以忠義自許今日之舉忠義何在潮慚而退圍守四十餘日朝廷聲問不通潮聞上皇已幸蜀復以書招巡大將六人白巡以兵勢不敵且上存亡不可知不如降賊巡陽許諾明日堂上設天子畫像帥將士朝之人人皆泣引六將於前責以大義斬之士心益勸城中矢盡巡縛藁爲人千餘被以黑衣夜縋城下潮兵爭射之得矢數十萬其後復夜縋人賊笑不設備乃以死士五百斫潮營潮軍大亂焚壘而遁追奔十餘里潮益兵圍之巡使部將雷萬春於城上與潮相聞語未絕賊弩射之面中六矢而不

動潮疑其木人使諜問之乃大驚遙謂巡曰向見雷將軍方知足下軍令矣然其如天道何巡謂之曰汝未識人倫焉知天道未幾出戰擒賊將十四人斬首百餘級賊乃夜遁自是數擊破賊軍分別其衆凡胡兵悉斬之脇從者皆令歸業旬日間民去賊來歸者萬餘戶

十二月張巡移軍寧陵與賊將楊朝宗戰大破之

令狐潮李廷望攻雍邱數月不下築城於雍邱之北絕其糧援賊常數萬人而張巡衆纔千餘每戰輒克河南節度使虢王巨屯彭城假巡先鋒使是月魯東

張中丞事實集錄

卷首

七

平濟陰陷於賊賊將楊朝宗帥馬步二萬將襲寧陵斷巡後巡遂拔雍邱東守寧陵以待之始與睢陽太守許遠相見是日朝宗亦至巡遠與戰晝夜數十合大破走之斬首萬餘級勅以巡爲河南節度副使以將士有功遣使詣虢王巨請空名告身及賜物巨唯與折衝果毅告身三十通不與賜物巡移書責巨巨竟不應

二載正月賊將尹子奇寇睢陽張巡入睢陽與許遠拒却之

安慶緒以子奇爲河南節度使子奇以歸檀兵十三

萬趣睢陽許遠告急於巡巡自寧陵引兵入睢陽巡有兵三千人與遠兵合合六千八百人賊悉衆逼城巡督勵將士晝夜苦戰一日或二十合凡十六日擒賊將六十餘人殺士卒二萬餘眾氣百倍遠謂巡曰遠懦不習兵公智勇兼濟遠請爲公守請公爲遠戰自是之後遠但調軍糧修戰具居中應接而已戰陳籌畫一出於巡賊遂夜遁

三月尹子奇復寇睢陽張巡擊走之二十合

尹子奇復引兵攻睢陽張巡謂將士曰吾受國恩誓以死守但念諸軍捐軀力戰而賞不酬勳以此痛心

張中丞事實集錄

卷首

六

耳將士皆激勵請奮巡乃椎牛饗士盡軍出戰賊望見兵少笑之巡執旗帥諸將直衝賊陣賊乃大潰明日賊又合軍至城下巡出戰晝夜數十合屢摧其鋒賊攻圍益急巡於城中夜鳴鼓嚴隊若將出擊者賊聞之達旦徹備旣明巡乃寢兵絕鼓賊以飛樓瞰城中無所見遂解甲休息巡與南霽雲雷萬春等十餘將各將五十騎開門突出直衝賊營斬賊將五十餘人巡欲射子奇而不識剡蒿爲矢中者喜謂巡矢盡走白子奇乃得其狀使霽雲射之中其左目幾獲之子奇乃走

秋七月尹子奇復寇睢陽

子奇復徵兵數萬攻睢陽城中食盡將士人廩米日
一合雜以茶紙樹皮爲食饋救不至士卒消耗至千
六百人皆饑病不堪鬪遂爲賊所圍張巡乃修守具
賊爲雲梯勢如半虹置精卒二百人於其上推之臨
城欲令騰入巡預於城潛鑿三穴候梯將至一穴中
出大木末置鐵鉤鉤之使不得退一穴中出一木柱
之使不得進一穴中出一木末置鐵籠盛火焚之賊
又以鉤車鉤城上棚閣巡以大木置連鑊大環拔其
鉤而殲之賊又造木驢攻城巡鎔金汁灌之賊又以
土囊積柴爲磴道欲登城巡潛以松明乾蒿投之積
十餘日使人順風持火焚之巡之所爲皆應機立辦
賊服其智不敢復攻遂於城外穿三重壕立木柵以
守巡亦於其內作壕以拒之士卒死傷之餘纔六百
人時許叔冀在譙郡尙衡在彭城賀蘭進明在臨淮
皆擁兵不救城中日蹙巡乃令南霽雲犯圍而出告
急於臨淮進明愛霽雲勇壯具食延之霽雲泣曰睢
陽之人不食月餘矣霽雲雖欲獨食且不下咽大夫
坐擁強兵曾無分災救患之意豈忠臣義士之所爲
乎因嚙落一指以示進明曰霽雲旣不能達主將之

意請畱一指以示信歸報座中皆爲泣下霽雲至寧陵與城使廉坦同將步騎三千人且戰且行至城下大戰壞賊營死傷之外僅得千人入城中將吏知無救皆慟哭賊圍益急初房瑄爲相惡進明以爲河南節度使而以許叔冀爲之都知兵馬使俱兼御史大夫叔冀遂不受其節制故進明不敢分兵非惟疾巡遠功名亦懼爲叔冀所襲也

冬十月尹子奇陷睢陽張巡許遠死之

尹子奇久圍睢陽城中食盡議棄城東走張巡許遠謀曰睢陽江淮之保障若棄之去賊必乘勝長驅是

張中丞事實集錄

卷首

三

無江淮也且我眾饑羸走必不達古者戰國諸侯尙相救恤況密邇羣帥乎不如堅守以待之茶紙旣盡遂食馬馬盡羅雀掘鼠鼠又盡巡出愛妾殺以食士城中知必死莫有叛者所餘纔四百人賊登城將士病不能戰巡西向再拜曰臣力竭矣生旣無以報陛下死當爲厲鬼以殺賊城遂陷巡遠俱被執子奇問曰聞君每戰皆裂齒碎何也巡曰吾志吞逆賊但力不能耳子奇以刀抉視之餘纔三四并南霽雲雷萬春等三十六人皆被殺巡且死顏色不亂生致許遠於洛陽巡出守睢陽時卒尙萬人城中居人亦且

數萬巡一見問姓名其後無不識者前後大小戰凡
四百餘殺賊卒十二萬人巡行兵不依古法教戰陳
令本將各以其意教之人或問其故巡曰今與胡虜
戰雲合鳥散變態不恒數步之間勢有同異臨期應
猝在於呼吸之間而動詢大將事不相及非知兵之
變者也故吾使兵識將意將識士情投之而往如手
之使指兵將相習人自爲戰不亦可乎器械甲仗皆
取之於敵未嘗自脩推誠待人無所疑慮臨危應變
出奇無窮號令明賞罰信與衆共甘苦寒暑故下爭
致死力張鎬聞睢陽圍急倍道亟進檄譙郡太守閻

張中丞事實集錄

卷首

三

邱曉救之曉不受命鎬至睢陽城已陷三日矣鎬召
曉杖殺之

張中丞事實集錄卷首其發無不痛者前封大知凡

張中丞事實集錄卷上

光山王德茂編

元和陸嵩校

遺著

謝加金吾衛將軍表

想娥眉之碧峯豫游西蜀追緣耳於元圃保壽南山逆賊祿山戮辱黎獻羶臊闕庭臣被圍七旬親經百戰主辱臣死當臣致命之時惡稔罪盈是賊滅亡之日

甲書對字詁判

甲書字詁所由計功不及日請科罪不伏訴云

張中丞事實集錄

卷上

紙類不同

甲楷法有間頗齊刀筆之吏象形自業偏在寫書之官不能殺竹惟青臨池盡黑當年有立應已盈裾計日不移無慚尺牘今乃字詁是事日課有違左氏門庭雖多筆硯稚川史籍不滿巾箱曾莫負於五車徒見司於雙管以是會意雖則麾肱不能中程何爲當理今之薄詠將俟片言欲遲單父之書須辨洛陽之紙然則類之大小猶或可云刑之出入於是乎在

對西陸朝覲判

張中丞西陸朝覲闕彤形繹之供御史劾之非其時不合

薦必及時政無墜禮雨雹可禦淒風不流惟乙凌陰是

司將頽肉之列愛候伐冰之家將當夜頽有

此上數句應有闕誤

朝覲無戒且不遠於西陸蓋取異於東鄰既憐申豐將

除苦雨之變翻慚高子不爭靈星之詩御史職在乘驄

誠爲直指有司義乖祭饗猶曰非時徒欲事於煩言得

無同於矯舉罪之則可詆亦難從

守睢陽詩

接戰春來苦孤城日漸危合圍俾月暈分守效魚麗屢

厭黃塵起時將白羽麾裏瘡猶出障飲血更登陣忠信

張中丞事實集錄

卷上

二

應難敵堅貞自不移無人報天子心計欲何施

夜間笛

宕堯試一臨虜騎附城陰不辨風塵色安知天地心營

開邊月近戰苦陣雲深旦夕高樓上遙聞橫笛音

詔

唐代宗大曆二年詔

頃者國步艱難妖星未落中原板蕩四海橫波公等內

總羸師外臨勅敵析骸易子曾未病諸兵盡矢窮乃其

憂也嗚呼天未悔禍人何以堪寧甘殺身不附凶黨信

光揚於史策可龜鑑於人倫宜立廟焉以時祭祀

表

進張中丞傳表

李瀚

臣聞聖主褒死難之士育死士之孤或親推輜車或追建封邑厚死有以慰生撫存有以答亡然後君臣之義貫以生死激勸之道著於存亡君所以不遺於臣臣所以不背其君君恩臣節於是乎立伏見故御史中丞贈揚州大都督張巡生於昌時少習儒訓屬逆胡搆亂凶虐滔天挺身下位忠勇奮發率烏合之衆當漁陽之鋒賊將竊據洛陽控引幽朔驅其猛銳吞噬河南巡前守雍邱潰其心腹及魯炅十萬之師棄甲於宛葉哥舒以

張中丞事實錄

卷上

三

天下之衆敗績於潼關兩宮出居萬國波蕩賊遂僭盜神器鴟峙兩京南臨漢江西逼岐雍羣帥遷延而不進列郡望風而出奔而巡獨守孤城不爲之卻賊乃遶出巡後議圖江淮巡退軍睢陽扼其咽喉前後拒守自春徂冬大戰數十小戰數百以少擊衆以弱制彊出奇無窮制勝如神殺其凶醜凡九十餘萬賊所以不敢越睢陽而取江淮江淮所以保全者巡之力也城孤糧盡外救不至猶奮羸起病摧鋒陷堅俾三軍之士敵虜而食之死不叛及城陷見執終無撓辭顧叱凶徒精貫白日雖古之忠烈何以加焉伏以光天文武大聖孝皇帝陛

下聰明文思睿哲神武提一旅之衆復配天之業賞功
褒節大賚羣臣遂贈揚州官及其子此誠陛下發德音
之美也而議者或罪巡以食人愚巡以守死臣切痛之
今臣敢取十倫以議巡過以塞衆口惟聖聰鑒焉臣聞
人稟教以立身刑原情而定罪故事有虧教則人道不
列刑有非罪則王法不加忠者臣之教恕者法之情今
巡握節而死非虧教也析骸而爨非本情也春秋之義
以功覆過咎繇之典容過宥刑故大易之戒遏惡揚善
爲國之體錄瑜棄瑕今衆議巡罪是廢君臣之教紕忠
義之節不以功掩過不以刑恕情善遏惡揚錄瑕棄瑜
非所以獎人倫明勸戒也且逆胡背德人鬼所讐朝廷
衣冠沐恩累代大臣將相從逆比肩而巡朝廷不登坐
宴不與不階一伍之衆不假一節之權威肅義旅奮身
死節此巡之忠大矣賊勢憑陵連兵百萬巡以數千之
衆橫而制之若無巡則無睢陽無睢陽則無江淮賊若
因江淮之資兵彌廣財彌積根結盤據西向以拒王師
雖終於殲夷而曠日持久國家以六師震其西巡以堅
壘搯其東故陝鄆一戰而犬羊北走王師因之而勝聲
勢纔接而城陷此天意使巡保江淮以待陛下之師師
至而巡死也此巡之功大矣古者列國諸侯或相侵伐

猶有分災救害之義況諸將同受國恩奉辭伐罪乎巡所以固守者非懷獨克之志亦以待諸軍之救救不至而食盡食既盡而及人乖其本圖非其素志則巡之情可求矣設使巡守城之初已有食人之計損數百之衆以全天下臣猶曰功過相掩況非其素志乎在周典之三宥其一曰宥過失故語巡之忠則可以敦世教議巡之功則可以繫中興原巡之情則可以宥過失昔夫子制春秋明褒貶齊桓將封禪略而不書晉文公召王河陽書而諱之蓋以匡戴之功大可以掩僭禪之過也今巡蒼黃之罪輕於僭禪興復之功重於匡戴罪疑惟輕

功疑惟重聖人之訓昭然可徵臣故謂巡者可以爲訓矣臣又聞罰不及嗣賞延於世三代所以直道而行今巡子亞夫雖受一官不免饑寒之患江淮旣巡所保戶口充完臣謂宜封以百戶俾食其子臣又聞彊死爲厲游魂爲變有所歸往則不爲災巡旣身首支離將士等骸骼不掩臣謂宜於睢陽城北擇一高原招魂葬巡并將士大作一墓而葬使九泉之魂猶思效命三軍之衆有以輕生旣感幽明且無寃厲亦國家志過旌善垂誠百世之義也臣少與巡游巡之生平臣所知悉今巡死大難不覩休明惟期令名是其榮祿若不時紀錄日月

寢悠或掩而不傳或傳而不實巡生死不遇誠可悲焉
臣敢採所聞得其親睹撰傳一卷昧死獻上伏惟陛下
大明在上廣運臨下仁遐之德洽於艱難有善必紀無
微不錄儻以臣所撰編列史官雖退死邱壑骨且不朽
以書後

書後

韓耳愈

元和二年四月十三日夜愈與吳郡張籍闔家中舊書
得李翰所爲張巡傳翰以文章自名爲此傳頗詳密然
尙恨有闕者不爲許遠立傳又不載雷萬春事首尾遠
雖材若不及巡者開門納巡位本在巡上授之柄而處

張中丞事實集錄

卷上

六

其下無所疑忌竟與巡俱守死成功名城陷而虜與巡
死先後異耳兩家子弟材智下不能通知二父志以爲
巡死而遠就虜疑畏死而辭服於賊遠誠畏死何苦守
尺寸之地食其所愛之肉以與賊抗而不降乎當其圍
守時外無虻蚍蟻子之援所欲忠者國與主耳而賊語
以國亡主滅遠見救援不至而賊來益衆必以其言爲
信外無待而猶死守人相食且盡雖愚人亦能數日而
知死處矣遠之不畏死亦明矣烏有城壞其徒俱死獨
蒙愧恥求活雖至愚者不忍爲嗚呼而謂遠之賢而爲
之耶說者又謂遠與巡分城而守城之陷自遠所分始

以此詆遠此又與兒童之見無異人之將死其臟腑必有先受其病者引繩而絕之其絕必有處觀者見其然從而尤之其亦不達於理矣小人之好議論不樂成人之美如是哉如巡遠之所成就如此卓卓猶不得免其他則又何說當二公之初守也寧能知人之卒不救棄城而逆遁苟此不能守雖避之他處何益及其無救而且窮也將其創殘餓羸之餘雖欲去必不達二公之賢其講之精矣守一城捍天下以千百就盡之卒戰百萬日滋之師蔽遮江淮阻遏其勢天下之不亡其誰之功也當是時棄城而圖存者不可一二數擅強兵坐而觀者相環也不追議此而責二公以死守亦見其自比於逆亂設淫詞而助之攻也愈嘗從事於汴徐二府屢道於兩府間親祭於其所謂雙廟者其老人往往說巡遠時事云南霽雲之乞救於賀蘭也賀蘭嫉巡遠之聲威功績出已上不肯出師救愛霽雲之勇且壯不聽其語強畱之具食與樂延霽雲坐霽雲慷慨語曰雲來時睢陽之人不食月餘日矣雲雖欲獨食義不忍雖食且不咽因拔所佩刀斷一指血淋漓以示賀蘭一座大驚皆感激爲雲泣下雲知賀蘭終無爲雲出師意卽馳去將出城抽矢射佛寺浮圖矢著其上輒半箭曰吾歸破

賊必滅賀蘭此矢所以志也愈貞元中過泗州船上人猶指以相語城陷賊以刃脅降巡巡不屈卽牽去將斬之又降霽雲雲未應巡呼曰南八男兒死耳不可爲不義屈雲笑曰欲將以有爲也公有言雲敢不死卽不屈張籍曰有于嵩者少依於巡及巡起事嵩常在圍中籍大厯中於和州烏江縣見嵩嵩時年六十餘矣以巡初嘗得臨渙縣尉好學無所不讀籍時尙小粗聞巡遠事不能細也云巡長七尺餘鬚髯若神嘗見嵩讀漢書謂嵩曰何爲久讀此嵩曰未熟也巡曰吾於書讀不過三遍終身不忘也因誦嵩所讀書終卷不錯一字嵩驚以

爲巡偶熟此卷因亂抽他帙以試無不盡然嵩又取架上諸書試以問巡巡應口誦無疑嵩從巡久亦不見巡常讀書也爲文章操紙筆立書未嘗起草初守睢陽時士卒僅萬人城中居人戶亦且數萬巡一見問姓名其後無不識者巡怒鬚髯輒張及城陷賊縛巡等數十人坐且將戮巡起旋其衆見巡起或起或泣巡曰汝勿怖死命也衆泣不能仰視巡就戮時顏色不亂陽陽如平常遠寬厚長者貌如其心與巡同年生月日後於巡呼巡爲兄死時年四十九嵩貞元初死於亳宋間或傳嵩有田在亳宋間武人奪而有之嵩將詣州訟理爲所殺

嵩無子張籍云

張中丞傳跋

歐陽修

右張中丞傳李翰撰嗚呼張巡許遠之事壯矣秉筆之士皆喜爲之稱述也然以翰所記考唐書列傳及韓退之所書皆互有得失而列傳最爲疎略雖云史家當記大節然其大小數百戰屢敗賊兵其智謀材力亦有過人可以示後者史家皆滅而不著甚可惜也翰之所書誠爲大繁然廣記備言所以備史官之采也

論

張中丞論

楊炳

張中丞事實集錄

卷上

九

天寶之變胡颯驍惡河北二十四郡當之而敗魯炁當之而敗哥舒翰當之而敗房琯當之而敗殘破兩京若摧朽然其何有於江淮之脆弱哉設令虜入睢陽許遠止有一死而已賀蘭進明虢王巨許叔冀輩必且草間求活賣降恐後其能一矢相加遣乎賊將蔓據揚徐蹂踐淮泗兵愈廣糧愈富勢愈張西向以敵靈武卽十李郭彼此相當其能以歲月奏功耶唐之爲唐未可知也張公巡以一縣令起兵雍邱有衆三千而令狐潮李廷望楊朝宗李懷仙謝元同環向迭攻輒以敗去及許遠告急公拔衆來援併兵纔六千八百耳正月尹子奇率

賊十三萬攻之敗去三月引兵復攻之敗去五月復益
兵攻之敗去七月復徵兵攻之旅去旅來愈敗愈憤簡
良選銳殲於城下至殺將三百殺卒一十二萬竟不能
越睢陽尺寸之地而江淮安若泰山此已褫慶緒之魄
而寒思明之膽故一聞新店之敗倉皇夜走而計莫之
出也嗟乎使其糧餉粗足兵不枵斃子奇之首必懸商
邱之市曹賊南北受敵背腹夾攻狡穴盡傾腥風都掃
殄滅無噍類又何至遺餘孽爲河北之患哉噫巡死而
李郭得以獨有其功無巡而唐一再傳遂失河北巡之
生死其關係豈小小哉或徒以一死爲巡取是井中之
見也史氏曰天以完節付二人余曰天以完節付二人
是天不以完天下還唐

張中丞事實集錄

卷上

十

張巡許遠論

孫之翰

宰相盡大公之心尙慮智謀不至或致敗事況可狹不
平之意乎房琯之爲相也與賀蘭進明有私怨進明帥
河南旣兼御史大夫是假風憲之威以重其任琯又用
許叔冀爲都將亦兼大夫均其官使不爲下此宰相存
不平之意一舉事爾遂至睢陽危迫進明不救忠賢數
人爲賊所害軍民之衆罹其屠戮則宰相乘不平之意
一舉事至於此也或曰賀蘭進明好進之人張巡許遠

功名既高固有嫉之之意雖無許叔冀爭權亦未必出兵救援則睢陽陷賊實進明之罪不繫房瑄之過也答曰進明先援攝大夫不滿其意遂極言排瑄交憾愈深此固好進之人及帥河南權任甚重瑄或慮其難制必用大將以分其權則當擇賢才任之使共力國事奈何用叔冀一狡險人爲都將復重其官與節帥等是正使各尙氣勢不相下爾此豈宰相大公之意也不然進明雖好進之人於巡遠功名不無嫉之之意當南霽雲求救忠義憤發言詞哀切足以感激於人稍異木石者必動心也進明亦非全然凶很不知情義之人安得絕無救之之意豈非有所憚而然也或曰韓愈作張巡傳後敘止言巡遠聲威功績出已上不肯出師救絕不言許叔冀事豈非舊史傳之誤也答曰愈敘張巡事蓋以李翰所作張巡傳尙有遺落故據汴徐間老人言有所書爾老人之言傳當時事述又豈能窺進明之情也況愈之所言止謂遠事故不盡言其本末爾舊史高適傳載移書許叔冀使釋憾同援梁宋事此尤足證明則房瑄挾怨用人致睢陽陷沒頗得其吁嗟夫房瑄以時名作相不能立大功輔大業茲已負肅宗倚任之意又復挾怨用人致敗國事則瑄之流落以沒非不幸也後得爲

相者深戒之

傳家集論張中丞事

司馬光

天授之謂才人從而成之之謂義發而著之事業之謂功精敏辯博拳捷趨勇非才也驅市井數千之衆摧胡虜百萬之師戰則不可勝守則不可拔斯可謂之才矣死黨友存孤兒非義也明君臣之大分識天下之大義守死而不變斯可謂之義矣攻城拔邑之衆斬首捕虜之多非功也控扼天下之咽喉蔽全天下之大半使其國家定於已傾存於旣亡斯可謂之功矣於乎以巡之才如是義如是功如是而猶不免於流俗之毀況其曖

張中丞事實集錄

卷上

三

曖者耶

性理書論張中丞事

朱熹

伏節死義之士當平居無事之時誠若無所用者然古之人君所以必汲汲以求之者蓋以如此之人臨患難而能外死生則其在平世必能輕爵祿臨患難而能盡忠節則其在平世必能不詭隨平口無事之時得而用之則君心正於上風俗美於下足以逆折姦萌潛消禍本自然不至真有伏節死義之事非謂必知後日當有變故而預蓄此人以擬之也惟其平日自恃安寧便謂此等人材必無所用而專取一種無道理無學識重爵

祿輕名義之人以爲不務矯激而尊寵之是以綱紀日壞風俗日偷非常之禍伏於冥冥之中而一旦發於意慮之所不及平日所用之人交臂降叛而無一人可同患難然後前日擯棄流落之人始復不幸而著其忠義之節以天寶之亂觀之其將相貴戚近幸之臣皆已頓顙賊庭而起兵討賊卒至於殺身滅族而不悔如巡遠杲卿之流則遠方下邑人主不識其面目之人也使明皇蚤得巡等而用之豈不能消患於未萌巡等蚤見用於明皇又何至有死義伏節之舉哉

侯鯖錄論張中丞事

趙德麟

張中丞事實集錄

卷上

三

張巡之守睢陽玄宗已幸蜀胡雛方熾孤城勢蹙人食竭以紙布切煮而食之時以茶汁和之而意自如其謝金吾將軍表詞甚忠勇又許遠亦有祭文爲時所重所謂太乙先鋒蚩尤後殿蒼龍持弓白虎捧箭又祭城隍文皆文武雄健志氣不衰眞忠烈之士也劉禹錫曰此二公天替其心俾之守死善道向若救至身存不過一張僕射耳則巡遠之名焉以光萬古哉

殺妾辨

闕名

張公巡正史有傳稗官有記儒先君子有論斷天下後世無一人不知其忠無復可言者竊心自古衆寡不敵

安危不論未有特甚如睢陽者而卒以幹復國步豈死力勝算固足以辦是乎哉將必有所本也公初仕時不肯見楊國忠曰是方爲國怪祥立志固已卓越及多難之際機鋒百變猶從容賦詩若處平治識度過人遠甚其斥令狐潮未識人倫焉知天道此又聖賢知性知天之旨尤見公學術醇正光大高明足以敷賁壯猷如此獨殺愛妾老弱婦人以餉士卒古所未聞或有疑異惟通鑑記事具有次序於其所忍見其所不忍誠非得已而不可已者蓋當時天下重在江淮江淮所恃以蔽障者睢陽耳使糧餉不繼城守易摧賊兵南來王師未浹雖

張中丞事實集錄

卷上

齒

百勝萬死無濟於國矣夫寸土未浸丈水不能橫流裹瘡之餘苟得日遇一食猶可延拒奔突以待事機此公所以置成敗可否於不料而決爲其所不爲也使計不出此早數日陷則東京之平亦未可保故睢陽之事不專於能取而以能守爲重不難於敢死而以處死爲難其功直使後世人臣知徒死不足以報君而報君之重蓋有重大艱難於死者嗟夫舉自古未爲之事遺當時再造之資示百代死義之心是之謂大忠不有非常之人可以幸致此哉或有言殺妾食人一何忍也

故爲之辨

厲鬼辨

謝應芳

往予過無錫適州人出郭迎神其神赤髮青面吻出四
牙狀極詭異旗旄歌吹衛從而昇之子誦而問焉人曰
此唐張巡也因公嘗有當作厲鬼之語故稱公爲疫厲
之神而崇奉焉嗟夫何邪說附會至此耶按唐史公守
睢陽如一木支大厦之踣兵力盡竭死不忘君故發憤
曰生不能報陛下死當爲厲鬼以殺賊此蓋忠義激烈
之辭豈其爲疫厲之鬼禍天下後世之人哉所謂厲鬼
者乃汎言剛厲之鬼與韓文驅厲鬼之厲同非厲疫之
厲也誣前賢惑後世邪說之害一至於此不可不辯恨
子老無能一洗習俗之陋區區謦言用告來者

張中丞事實集錄

卷上

五

序

完節錄序

楊元吉

萬厯辛亥桂月六日貞伯氏和父氏共數人小飲駝山
之鷓鴣橋因憶睢陽舊事率成憶睢陽八闕相與歌之
風馬雲車恍惚上下歸而檢張中丞傳旁及天寶遺事
唐宋後文詞詩賦彙爲四卷名曰完節錄付之梓人竊
惟伊周而下文武全德可將可相者於漢得一人焉曰
諸葛丞相亮於唐得一人焉曰張中丞巡諸葛具有定
評勿論張中丞之起兵討賊守睢陽也戰則必勝令敵
不能敗守則必固令敵不能攻以寡制衆以弱制強智

勇機權奇妙百出可以見將帥之才矣公實儒者爲名
進士于書無所不讀其詩文遒勁可誦其筮仕不依冰
山甘處遠縣其臨事顛沛危迫從容賦詩若丁治世其
處死顏色不亂陽陽如平常其議論未識人倫焉知天
道則子思子知天知人孔子下學上達之旨其識度之
超卓其涵養之深到其學問之詣入不已登賢聖之堂
乎此可觀宰相之器矣夫春秋之義復讐爲重管氏之
仁本於攘夷宋人譚天譚人譚事功節義若周孔復生
及譚禦夷復讐則曰須養士訓兵十數年後用之河清
可俟人壽有幾以故靈州之役守者血書請救而竟棄

張中丞事實集錄

卷上

六

之不恤遂令中國衣冠夏人得其一完顏得其五奇渥
温全而有焉誰之咎與東山破斧夾谷誅萊倉卒有戎
咄嗟而辦下如柴世宗嗣周卽有高平之戰曾亦訓兵
數年積糧數年否有周孔之議論而復有周孔之功蹟
難矣哉蓋典午而後文武分途有文事未必有武備有
學問淵源成規成矩可爲太平之宰相而撥亂則撓韜
鈴閑習能正能奇可爲一方之干城而論道則諄故姚
宋韓富名相也不能將英衛張韓名將也不能相其它
者舉揮塵容耳況胡虜之禍垂涎鼎鑊視周漢萬萬則
所需文武全人固甚亟也而何處得之人徒侈誦睢陽

死節事當時如盧奕李愷顏杲卿輩比比能之何足爲
公羨獨惜文武將相之才數百年一間出而不究其用
竟與睢陽俱碎恨不得借上方手刃賀蘭起公於九原
而爲之執鞭也余故曰伊周而下漢諸葛丞相唐張中
丞兩人而已錄曰完節亦仍史氏之舊議更曰完德而
未之敢云

題唐忠臣錄序

徐維超

唐忠臣錄始於松江衛君庸續於上虞顧君伯圭皆州
守成於新安鄭先生瑄則州學博也予謫倅睢陽下車
越三日謁中丞廟在郡譙樓東祠唐六君子御史中丞

張中丞事實集錄

卷上

七

張巡睢陽太守許遠位於中左則馬軍兵馬使南霽雲
睢陽裨將雷萬春右則東平守姚閭單父尉賈賁皆南
向其廟貌皆有生氣凜凜不可犯忠肝義膽宛然若存
謁畢鄭先生持其所編忠臣錄示予展卷一覽其履歷
本末纖悉具見歎曰葩卉松柏之當春陽發榮暢達莫
不鬱鬱葱葱及遭霜雪歷沍寒萬木凋零而松柏獨蒼
然不變君子小人之在治世儋爵食祿莫不濟濟踰踰
及臨利害遇事變奸邪喪守而君子挺然不屈是知六
君子者其歲寒中之貞松勁柏與若夫死難忠義詳載
於古今名賢表傳序記茲不贅

祭文

還京次睢陽祭張巡許遠文

高士適

維乾元元年五月日太子詹事御史中丞高適謹以清酌之奠敬祭於故御史中丞張許二公之靈中丞體質貞正才掩羣豪詩書自負州縣徒勞惆悵雄筆辛勤寶刀時平位下世亂節高賊臣通逆國步驚駭兩河震恐千里嗷嗷投袂灑泣據鞍鬱陶全譙入宋收梓捍曹心繫魏闕志清武牢帝曰嗟爾龍光豹韜憲台戎幕持斧擁旄嗚呼余亦忝竊統茲甲冑俄奉短書至夔狂寇裹糧訓卒達曙通畫軍乃促程書亦封奏遂發趨勇俾驅鳥獸將無止心兵亦死鬪賊黨頻蹙我師旋漏干城相望百里不揅紘紘嘯聚兵鋒亦湊積薪爲梁決岸成竄嗚呼當此虎敵豈無強鄰常時肝膽今日越秦堅守半歲絕糧數旬柿椽秣馬煮紙飼人病不暇拯歿無全身煎熬甲冑啄嚙膠筋慷慨艱險淒涼苦辛嗚呼我辭淮楚將赴伊洛途出茲邦悲纏舊郭邑里灰燼城池墟落何九拒之崢嶸皆二賢之制作聲蓋天壤氣橫遼廓讓死爭先臨危靡卻嗚呼闕天亦難論萬夫開壁一旅纔存衰羸旣竭力弱相吞陷阱織路梯衝棧門土壕水合木柵雲屯居卽其敵突無其奔煙雲劒戟逼側紛昏與

張中丞事實集錄

卷上

六

求生而害義寧抗節以埋魂嗚呼悖逆殲潰于戈將止
海岳澄清朝廷邳理封功列爵懷黃拖紫傷哉二賢不
預於此嗚呼孀婦伶俜愛子追贈方榮賞茲始寂寂梁
苑悠悠睢水黃蒿連接白骨填委思壯志於冥寞問遺
形於荆祀列祭空城一悲永矣二人翼以登視十有六

節記三

縣志鹽官重建雙廟記壽太平而實鍾必萬

縣西舊有許遠祠後增祀張巡號雙廟宋紹興八年詔
增祀南霽雲雷萬春姚間蓋從邑人禮部侍郎張九成
之請也古屋數椽日懼覆壓甚不稱上之人所以訓民

張中丞事實節錄

卷上

九

事神之意是年知縣事會稽陳恕祇謁祠下嗟惋良久
明年歲豐民和始謀於邑之隱居南豐曾伋卽撤廢尼
院舊殿增易之踰年功未成恕受代去伋不忍中輟於
是竭力勸諭隨獲隨創積六年而廟成實慶元二年也
前殿三楹遂取唐史臣之贊榜曰雄挺盡節之殿夾以
兩廡圖睢陽死節將佐三十有二人翼以修廊十有六
楹繪戰守之蹟於壁如史所載金碧晃耀觀者心悸不
翅若親目當日之事也明年書來諗曰願有以記必萬
竊觀先王之典以死勤事則祀之若五公者非所謂以
死勤事者乎中興初皆賜上公爵俾歲時長吏致祭籩

豆牲牢名物如上公禮勸民之意遠矣鹽官許公故里舊史圖誌可據也獨新史略之或遂以公爲右相敬宗曾孫杭之新城人殊失建祠錫爵之本意敬宗善心之子善心亨之子懋之孫按北史善心傳南史懋傳竝著鄉里高陽新城以此知舊史載敬宗爲杭之新城者誤矣後之人不攷併與公誣之烏得無辨若夫公之名節爛然與日月爭光史自有傳不必序特是正其鄉里以堅邑人之信慕云

而天鹽官重修雙廟記

錢惟善

夫忠臣義士立功績勵節操者何代無之求之當時在張中丞事實集錄

卷上

三

公論而無愧求之後世在人心而不忘至於廟食故鄉而天下婦人女子武夫賤隸皆知姓名蓋千百世而一見者也若蜀之武侯唐之張許殆庶幾乎武侯之終隴蜀之人卽立廟以祀張許之歿睢之人亦立廟祀之其人品雖若不同要其奮不_顧死而後已則一耳武侯以崎嶇偏方之蜀與魏吳抗而終不能興復漢室以死張許守孤城以捍安史蔽遮江淮能使唐之亡雖死何憾皆忠於爲國者張許舊祠世謂雙廟在江之北惟睢陽有之蓋張死所也在江之南惟鹽官有之蓋許故鄉也初廟獨祀許後祀張宋紹興八年復增祀南雷姚三

公則從無垢先生請因題其額曰雄挺盡節之殿始於
知縣陳恕而成於隱居南豐曾伋故基凡若干丈長倍
之中爲殿夾以兩廡圖當時睢陽死節將佐凡三十有
二人翼以長廊十有六楹繪戰守之績於壁生氣凜然
如昨日事邑人祀之惟謹凡有疾疫水旱禱輒應我國
家初下江南有故宋丞相文山先生銳志恢復宋師屢
敗被獲而持節不屈過睢陽拜廟下嘗題樂府以激烈
平生慷慨之壯氣亦忠於爲國而欲爲二公之勳業者
至今過者猶能誦之悲夫至正十一年夏邑侯尹公旣
蒞政治民以寬事神以敬伏謁廟廷顧瞻棟宇傾撓廊
廡不治圖像黜昧就滅乃捐俸以倡而好義者樂助之
興工於是年冬訖功於十二年冬於是邦人從侯於廟
而落成之求予記其事旣爲文復爲詩二章俾民四時
歌之以迎送神云辭曰睢之水兮其流湯湯瞻彼雙廟
兮其神孔揚孰不有死兮死而不忘困守孤城兮蔽遮
淮江旌旆轟天兮弗得南向伊誰之功兮中興於唐千
秋萬禩兮歸來故鄉釃桂酒兮奠椒漿福我壽我兮東
海之旁睢之陽兮海之陔千秋萬禩兮報神之休牲牲
肥腍兮雜肴羞風馬雲車兮載蛟虬雨暘時若兮歲有
秋神之降假兮不可久畱目送神歸兮帝所傲遊焉得

忠貞兮化爲九州使我心悲兮何日而瘳

雙廟記

徐鳳琰

唐張許死節廟食睢陽以南霽雲配世稱雙廟是也歷代贈官皆至州大都督旣而增祀賈賁雷萬春復稱五王廟宋大觀中賜侯爵謚巡忠烈遠忠義霽雲忠壯賁忠濟萬春忠勇而表其廟曰協忠紹興中因鹽官有忠義侯廟詔許增祀如睢陽又合東平太守姚萇以配竝賜爵止公其於褒忠勵節至矣睢陽廟舊在城南七里許金末河南被兵蕩燬無孑遺邑之耆老相與謀欲構故基以祀張許前後數十年不克成至元二十有六年

張中丞事實集錄

卷上

三

主簿柴叔武與里人之好事者以爲城南遠香火不便卜地於睢陽城中面照碧堂而爲之祠介前歸德府判監察御史王茂來問古稱雙廟張許而已旣以南配又增賈雷徃制如此今襲而復之於義何如仍乞文以記余謂自古當大患難立大名節要非一手足之所能致奔走先後品量巨細人人殊而趨事赴功之心捐軀報國之志則一而已祀此遺彼何以勸況二公孤危之際嘗欲割肌以啖衆分所愛之肉以饗士同甘苦齊生死之意謂何若尸而祝之裸薦寅潔來歆來享風馬雲車其必景從上下四方也無疑遠稽唐文近徵宋禮俾有

位而得祀者咸秩焉柴叔武之舉不爲過嗚呼事有不
切身而興懷人有不同時而其憤是可觀也已余義之
而有感焉睢陽死節三十六人史稱寧陵之功別將二
十有五皆從巡死難而姓名之可見僅二十有一祀亦
弗及今祀於廟者纔六他所遺落者亦多矣或曰忠臣
義士知盡吾忠義而已生而心不能白於時死而名不
得聞於後者何限謂封侯廟食足以待天下之忠臣義
士則否余曰雙廟忠義之寄也將以啟天下忠臣義士
之心也錄張許而不及諸將固足爲史氏惜修祀典而
不遺數公余猶爲天下國家幸舉不祀不足爲諸公毫
陽死節者哉

重建協忠廟記

舊廟在城南七里許至元間兵燹之餘廟無孑遺且去
城遠不便香火主簿柴叔武卜地移南城中人又以不
便禱祈告按察僉事劉咸州守李君志指揮使趙君勝
偕僚屬以下乃相吉地州治之東率諸好事者捐俸貲
以徙焉鳩工營建爲殿者三間爲廡者東西各稱是爲

門屋者一間外門一座皆像神於其中周爲繚垣對樹
嘉木翰林朱孔易大書曰協忠廟宇完飭宏敞輪奐一
新足稱神棲而便瞻仰矣既落成郡人鴻臚卿徐君永
達徵文以志顛末姑著之麗牲之石且系之詩俾祀者
歌焉詩曰在昔阿犖機禍凶唐室有半淪羶風擊狐狂
狹騰妖蹤二十四郡誰其雄人豪挺特張許公一德比
義嬰孤墉斬臬馘獍摧逆鋒力幹綱紀天無功宗功報
德元祀同城頭雙廟褒典崇邇來徙吉州治東靈躍益
振秩益隆民康物阜年屢豐景貺攸萃昭精忠翠珉有
刻垂無窮

張中丞事實集錄

卷上

十四

唐御史中丞張公廟記

邵寶

錫人祀唐御史中丞張公舊矣相傳有宋崇寧間羽士
盧至柔者隱居錫山下掘井得泉以丹砂書符蝨磚志
將拯人於是立公祠於井上以主之民仰公之忠義奉
祠益謹而神益靈凡水旱疾疫有禱斯應國朝景泰六
年耆民錢守常等具列公忠義之實并其孚佑錫人者
奏聞乞春秋如祀典詔可自時厥後公私交禮香楮牲
醴奔走祠下者日盛一日然其祠尙列東嶽廟右廡飾
以怪狀造以雜厲弗稱明祀前知縣李侯乃擇地於祠
之東北創新廟焉前門後堂左右廡宇高爽整飭各適

厥度倣唐衣冠之制改塑神像正殿南面儼然臨之惟
春秋吉辰吏率厥職齋肅從事妄祈淫禱悉禁弗入後
數年鄉人繼而有作規制具備文采煥然周貴等乃以
麗牲之碑謂寶宜有所刻寶惟公忠義大節載諸史冊
昭然在人耳目不容以言語贊述矣竊以公之饗祠於
錫旣非故鄉又非身所宦歷之地宜若弗類或又爲誇
大之詞謂公保障江淮以全天下雖通祀爲宜者竇曰
是皆不然抑嘗聞之因俗之善而導之反俗之惡而戒
之先王之教也吳俗尙鬼而好祠盛於四方其來遠矣
然而錫之人所以拳拳致隆久而弗替者不曰他神而
獨曰中丞是誠何心哉於是見忠義常在人心一有感
觸遂不可已流俗之中此其可取焉爾況公因錫人之
致祠而靈斯聚焉其靈之昭應又足以感於神乎朝廷
俯從其請因方俗之善而導之也其出於民間未有祀
典也及其旣列祀典猶附於他廟未有專祠也今也典
禮具舉廟貌允協嚴幽明之儀息邪誕之說崇報享之
道而勸獎忠義者於是爲著雖祠公者不異於前而所
以爲祠者乃可傳於後世則是舉也豈徒然哉其曰保
障江淮以全天下雖通祀爲宜者求其說而不得苟爲
之辭而已耳非吾所敢知也嗚乎神不貴苟祀廟不貴

苟立苟祀苟立則其傳也不遠矣故寶仰述朝廷因俗
導民以義起禮者敬刻於石庶以永其祀焉謹記
其碑

唐河南節度副使左金吾衛將軍檢校主客郎中

兼御史中丞張公廟碑

浩然之氣配道義以塞乎天地之間初無先後古今彼
此遠近之間而其所乘之數詘於前信於後晦於其生
存而白於其既死又有一定而不可易者唐御史中丞
張公犯千古之所難激百代之其憤義足以得降賊之
力而不能來同鎮之援智足以得令狐潮之馬而不能
留嗣虢王巨之餉忠足以得六百年餘遠邑奔祀之心
而不能免在殞議謚之惑故嘗謂公不死於尹子奇之
手而死於賀蘭進明許叔冀之坐視城不陷於鬻妾掘
鼠之日而陷於濟陰之餽其事不難於死而難於未死
其節不難於罵賊就刃而難於楊國忠之不見其功不
繫於保障江淮以需恢復而繫於能使天下萬世曉然
知天道人倫之共貫而華夷逆順不容以少混若是者
其可以先後古今彼此遠近論乎否也無錫去城五里
許曰錫山公廟焉歲祀惟謹而靈貺響應不可誣也或
曰錫壯縣氣鍾茲山之靈也以公稱厲而尸焉人益

嚮往氣益結不可解或曰公非厲也祛厲者也臨決之辭當非苟然者加以裂眚碎齒之遺怒雄姦傑逆聞且氣沮況曰妖魘淫祟竊帝權以舖血食者耶予難公之行而爲公憤也久矣旣違於時憇是邑與諸士子論忠與義必以公最因謁公廟而鑱言於石

南陽張鐵二公廟碑

王世貞

在唐至德初而有逆胡之變時南陽張公巡以雍邱令破賊走之進守睢陽遷御史中丞凡七十戰城破而不屈以節死詔贈揚州大都督官其子亞夫金吾大將軍人主所以寵臨而光大之者旣極備而天下學士大夫

張中丞事實集錄

卷上

三

以至婦女孺子類能言之踰六百年而爲明之建文稱革除而文皇帝靖內難時南陽鐵公鉉以參政分省濟南固守不下尋扼王師於東昌累進右布政使兵部尙書參厯城侯軍文皇帝由他道入京師購得公責之跪不可剗其膝責之反顧又不可剗其耳鼻竟寸磔於市鐵公旣因不屈坐族而天下學士大夫嘖嘖噓噉於齒吻間而不敢吐後事漸解稍稍有筆之書者而會今天子卽位制詔大宗伯故革除被罪諸臣忠於所事甘蹈刑戮有司卽所祔之墳墓苗裔存者厚加卹錄以表忠魂勵臣節於是鐵公之事益大顯而南陽守維蓋令見

賓謂公其鄉人於詔得特祀而張公蓋前六百年而爲義而尙未有能祀之者以請於大梁之中丞御史咸報可乃卽郡城西闔故社學地中構堂三楹以安三公位左右廊楹各如之戟門一凡公帑之羨費者僅爲金三十餘皆令遜所任旣成而分守參政李君廷龍率守維蓋同守通通守希仁維熙令遜以狀來請世貞言以文麗牲之石世貞謝不敏則謂張公提一旅馮孤城遏十三萬之強敵以障江淮公死而賊旋滅其爲勳最大鐵公之守無異於張公其所摧堅折衝雅亦足相埒而不能救金陵之下然張公之所爲徇者七葉之天子而其

之於丹書之所志者而不恤孟氏有云先聖後聖其揆
一也噫嘻明德過唐殆萬萬矣今而後謁二公之祠者
爲封疆之臣則思其所守邦之薦紳衿裾則思其所立
感人主之激賞則思所以報觀二公之近者二百年遠
至八百年而若新則思所以不朽是參政與守丞倅令
意哉因記其事而系之銘詞曰臣有大綱上以酬分下
則成仁豈名之厚而薄五宗弁髦其身君有大德敵怨
不校而誼是敦旌彼後夫以繹前思以風嗣人於赫睢
陽爲淮儲胥不驚胡塵有烈司馬作齊息壤洪流其隄
毀魄全天賓於帝所恒爲明神崇廟巖巖擊鼓坎坎萬
舞僂僂駢虬翼鸞繚虹屈蛻雙甄儷輶疇疇右疇御霽雲
之徒以逮萬春若彼平安及齊汗驄母汗爾輪靈之未
格立髮嚼齟含意未伸靈旣格我膂旨鬯芬削厲爲忻
豐我稌黍同我城隍福我人民豫山凌空丹霞應之竝
表嶙峋讀此豐碑千秋萬年其人若新

張中丞事實集錄卷中

光山王德茂編

元和陸嵩校

樂章

迎神辭

楊均

月維良兮日旣望雁淒淒兮靡草黃潔營俎兮芬桂觴
導迎生氣兮睢之陽龍媒躩躩兮元雲翔佇想五公兮
下瑤堂儼如在兮曠祀舉肅雍列兮羅簪裳

有烈眞源兮雍邱起事哭元廟以討逆兮設帝像而誅

貳流睢橫潰兮吾惟其砥乘堞雅訊兮故人欲死椎牛

張中丞事實集錄

卷中

一

讐音泥妾兮士淚如洗甲食裹瘡兮戰不勝而攻不已人

畜盡烹兮兵餘其幾西向拜啟兮臣力竭兮生不全城

兮死爲厲鬼英槩不泯兮于千萬世右張國公

至德元禩兮王正錫之弓履兮于宋城負君恩兮稱

兵奮雌鯢兮雄鯨奪吾峙以資頰兮士靡半菽而呼癸

庚彼伯仲以視予兮吾求急於寧陵嗟血戰以百數兮

救兵絕而壘傾全本根於江淮兮固有死而實生撫乾

斗之庚申兮招神爽於千齡廟食故鄉兮垂休炳靈右許

國公

烈烈東平相之裔歷尉而守從知已孤墉相守誓以死

潞府元戎澤其子血食睢祠繪凌煙哀兮榮兮其兩至

右姚國公

挺忠壯兮頓邱義有合兮身留冒圍鐵兮乞師對宴樂
兮心憂徒示信以嚙指莫之救兮虔劉固將死兮不屈

渠違公兮作羞靈連蜷兮於薦羌朔吹兮颼颼

右南國公

儼忠勇兮在唐守雍邱兮毅以彊六弩著面兮目不逃
將軍令兮敵心降壓騎四百兮走披猖城墮身殞兮鴻

毛輕千載廟祀兮休有烈光

右雷國公

三獻辭

霜天曉角

丹楹轉月金繡紛幢鉞助在有唐宗社人千載仰英烈

張中丞事實集錄

卷中

二

維辰嗟盡節故里招虔揭靈御雝雝來下歆初薦俎

羞潔

初獻

當年宋壁血壅河流赤全護東南形勝百易萬五神力

人心同奮激立此生民極哀角載歌霜曉剡

音拘瓊醅

聖容懌

亞獻

忠忱誼幅對越如丹赤緬想遺風餘烈猶身見古顏色

惟馨非黍稷穆穆歆明德簞灑芳爨須醉迴雲旒佑

鄉國

終獻

送神辭

裸獻終禮紀具靈禋禋迴霄馭人祇分福祉聚

迎享送神辭

倪瓚

靈皇兮岱宗神之來兮駕蜚龍赫蒼顏兮朱髮如火紛
羽衛兮岳祇嶻嶭青霓矜兮白容裳降大荒兮被不祥
歐野仲兮逐游光惠我民兮神樂康蘿帳兮雲幄湛寒
泉兮瑟蘭勺撫偃蹇兮歛參差薦芳馨兮神享之靈娛
娛兮奈何樹紫檀兮山之阿匪斯兮兮福斯土沐神休
兮千萬古
神之去兮驂雲螭風剡剡兮吹靈旗悅臨風兮延竚悵
神游兮難駐神游兮翩翩撫一氣兮周八埏朝睠駕兮
西神夕弭節兮東魯噫神往兮莫我顧民有籲兮載福
張中丞事實集錄 卷中 三

斯祐折瓊華兮遲神歸歲復歲兮神寧我違石粿粿兮
流水壽我民兮報祀無已

些章

揚維楨

巡守睢陽志節與金石爭勁日月爭光古今無尚猶讓
其食旣盡食愛妾至大括城中婦人食之繼以男子陷
於殘忍夫守城爲民而食民守城何戕四肢而欲保其
身哉巡之食人非其本心爲救兵俟耳余獨疑厲鬼之
言訖不能殺慶緒殺子奇殺進明豈幽明二道耶抑後
來新店之戰其有陰兵助鶻而猝至耶人不得而知也
爲作厲鬼些

張孤忠掘鼠羅雀食不充啖妾啖人婦啖取飽我躬生
不能殺賊死誓厲賊爲鬼雄厲兮厲兮拏陰霧呼靈風
南山之背黃埃之中重爲些曰虺走孛虜兮彗掃鄴宮
奇死兮莊降厲兮厲兮歸來兮昂之西尾之東勿終爲
鬼雄厲鬼些
霽雲起微賤爲人操舟張巡被圍築臺募萬死一生者
數日無一人應俄有暗鳴而來者乃霽雲也其不畏死
可知南八男兒死耳不可爲不義屈雖不可啞其有不
死者耶觀其乞援賀蘭憤氣見於射塔之矢而志不遂
也君子悲之爲賦些章以繼無衣之詩

張中丞事實集錄

卷中

四

南八兒嚙指哭千人呼血誠豈滅申包胥臨淮節度眞
狗奴我歌無衣雙涕濡嗚呼我歌無衣雙涕濡南八兒

憶睢陽

楊元吉

祿兒燥兮思洗娘來動地兮紛犬羊元廟哭兮淚湯湯
憶睢陽義旗舉兮心未央起兵憶

潮拏磔兮厭我疆南八鳴兮熱我腸怒衝壘兮賊披猖
憶睢陽軍容振兮扶天綱磔拏憶

延秋開兮翠華忙朝問隔兮士亂行誅叛將兮借上方

憶睢陽衆競勸兮戰裹瘡誅叛憶

賊喉鯁兮障瀾狂賊精撓兮蒿大黃四百戰兮勲未償

憶睢陽餓十萬兮血淋漓

餓虜憶

春登陴兮阻秋霜醜愛姬兮餵餒腸歡同命兮我心傷

憶睢陽朽骨杳兮竝首陽

死守憶

飛單騎兮潰圍場瀝指血兮哀無糧妬功成兮心回翔

憶睢陽塔記恨兮恨何長

射塔憶

東南邊兮賊藏良西北征兮我武揚鬼雄厲兮旬日亡

憶睢陽配郭令兮興李唐

厲鬼憶

步鷓鴣兮柳鳴蜩瞻駝峯兮祀無疆赫忠精兮日同光

憶睢陽金聲振兮鬚髯張

廟貌憶

詩

張中丞事實集錄 卷中

過宋州

李 五 端

睢陽陷虜日外絕救兵來世亂忠臣死時清明主哀荒
郊春草徧古壘野花開欲爲將軍哭東流水不同

睢陽感懷

韋應物

豺虎犯天綱昇平無內備長驅陰山卒畧踐三河地張
侯本忠烈濟世有深智堅壁梁宋間遠籌吳楚利窮年
方絕輸鄰援皆攜貳使者哭其庭救兵皆不至重圍雖
可越藩翰量難棄饑喉待危巢懸命中路墜甘從鋒刃
斃莫奪堅貞志宿將降賊庭儒生獨全義空城惟白骨
同往無賤貴哀哉豈獨今千載當獻歛

南唐烈祖

天寶君王重女色周鼎摩挲輕一葉錦綳小兒思塞酥
羯鼓聲中歌吹咽漁陽鐵騎破山來虜氣腥羶漢宮闕
鑾輿遠播九廟驚馬嵬坡濺楊妃血當時猛將望風降
誰負綱常爲君切睢陽太守真源令將畧堂堂古今絕
撐拄東南半面天運籌夜坐孤城月裹瘡出戰四百餘
志欲吞胡皆俱裂矢盡糧空勢已窮亭士割恩烹愛妾
援兵不至將奈何坐使擎天雙柱折西風回首賊奴亡
天與英雄全大節二公一死重於山青史芳名終不滅
至今古廟祀睢陽令人千載泣忠烈

張中丞事實集錄

卷中

六

哀辭

宋高宗

惆悵悲故城城荒經戰事中原都失守此邦乃有備驕
虜勢轉侵王師多不利總戎喪良翰疇昔領羣帥文武
稟全才德刑修戰器深謀陷吳楚長策保淮泗萬乘已
蒙塵諸侯皆失位誠臣自猜阻宿將亦疑貳壯志感鬼
神軍聲動天地胡兵圍數合漢將戰逾厲乃勸貔虎師
不爲豺狼餌析骨爭請命飲血期誓志白日貫忠誠秋
霜明信義上天未悔禍矢盡糧亦匱狂寇肆殲夷吾徒
無噍類屠城逢潰卒墀井當陳隧沉痛弔傷魂蕭條絕
禋祀皇明啟休運內外銷姦壘董卓誅上京蚩尤斬中

冀緬驚殂謝久復嗟今昔異萬里掃妖氛三邊熄烽燧
既加汧城誅特表鎮南謚行李經故墟哀傷悼如醉巖
冬雁初度晏歲日窮次衰木嘯猿鳴荒榛聚魑魅旅帆
波上遠槁葉霜前墜冤氣如暮雲燐光雜寒吹懦夫乃
搯擊舊友爭洒淚蒼莽十月交徬徨百慮萃徒懷濟時
策撫劔不能寐

張許祠

王安石

兩公天下駿無地與騰驤就死得處所至今猶耿光中
原擅兵革昔日幾侯王此獨身如在誰令國不亡北風
吹樹急西日照窗涼志士千年淚泠然落奠觴

張中丞事實集錄

卷中

七

書睢陽事後

黃庭堅

莫道睢陽覆我師再興唐祚匪公誰流離顛沛義不辱
去就死生心自知政使賀蘭非長者豈妨南八是男兒
乾坤震蕩風塵晦愁絕宗臣陷賊詩

睢陽歌

劉敞

梁人猶唱睢陽歌隋人水調能相和梁人池臺已平地
隋人岸樹空嗟峨梁人隋人去如水水聲日夜流不已
張巡廟前春草生里人尙識將軍名國讐已滅心不死
憤氣半夜凌蒼冥丈夫節義豈在小願爲長劍剗長鯨

雙廟

劉子翬

無復連雲戰鼓悲英風凜凜在雙祠氣吞驕虜方張日
恨滿孤城欲破時幽鳥自啼檐際樹夕陽空照路傍碑
平生不作脂韋意倚棹哀吟兩鬢絲

五侯廟

張表臣

張許昭鴻烈南雷賈其靈無瑕雙白璧有曜五華星懷
哲音容在傷時涕淚零向來丹鳳闕猶帶羯胡腥

張巡

王令

祿兒射火燒九天鬼手不撲神聽旃羣庸仰口不肯唾
反出長喙噓之然睢陽城窮縮死驚危繫一髮懸九淵
巡瞋睨遠兩眦垢怒嚙齒碎須張肩恨身不毛劍無翼

張中丞事實集錄

卷中

八

不能飛去殘賊噉翁軀腥刀子噉俎日嚼肉血猶經年
霽雲東攘兩臂去西來才有九指還胸中憤氣吐不散
去隨箭入浮屠塼忠窮智索莫自效更憐愛妾嘗饑涎
我疑沒日賊不食恐其肉醜死不痊又疑身骨不化土
定作金鐵埋重泉何時山移陵谷變發出鼓鑄戈或鋌
吾如得之願有用不誅已然誅未然

文天祥

起師哭玄元義氣震天地百戰奮雄姿鬻妾士揮淚睢
陽水東流雙廟垂百世當時令狐潮乃爲賊游說

雙廟懷古

王暉

鐵輦動地來獵火燼九縣睢陽東南衝江淮國所援蔽
遮不使前恢復可立見二公明此機死守誓不變雖危
所保大如蝮螫解腕最難結衆心存歿匪石轉彼蒼界
全節誰爲落賊便已矣君不忘握爪掌爲穿竟能濟中
興淮海了清奠至今忠烈氣皎皎白日貫賀蘭觀成敗
不飲浮屠箭殺亡計多寡此論誠可辨我來拜遺像稟
對如生面乞靈激懦衷剗決剛同鍊朔風吹樹聲尙想
登陣戰暮倚暈月城悲歌淚如霰

雙廟

徐玟

最爾孤城振賊喉男兒死爾更何求生降說有潼關將
張中丞事實集錄

卷中

九

泉下相逢也合羞

千古蕭蕭易水風寒心寧與五公同遙思罵賊捐軀際
賈日知形幾白虹

鄉里睢陽俱立廟神游寧隔舊關河臨淮若見浮圖矢
應向雲間切齒過

當時南八泗州還死止幽冥記賀蘭好向靈祠壁間畫
鬼兵生抉進明肝

史遠道

食絕孤城守倍勤不辭殺妾饗三軍一時忠義人人奮
借死非徒南霽雲

關名

保障江淮百戰身每于青史嘆忠臣睢陽一死經千載
天寶已來能幾人前代古碑荒草雨東風社鼓杏花春
廢興往事傷陳迹弔罷吟成一愴神

党得舉

社稷憂深百戰勞睢陽城陷惜英豪將軍泉下休多恨
已有豬兒快寶刀

過忠顯雙廟

鄭玉

巍巍此雙廟皎皎兩忠魂一朝誓節義千古血食存孤
城日向危羅雀供晨昏老弱食殆盡少壯相噬吞攻守

張中丞事實集錄

卷中

十

既有定死生何足論豈知有後世但願唐世尊死者如
可作尙須起九原我來一瓣香再拜祠下門

孫子良

國破君何在艱危寄此身孤城抗全虜一髮引千鈞諸
葛終憂漢包胥空入秦可憐忠義友亦作說降人

張中丞廟

高啓

延秋門上烏啼霜羯奴曉登天子牀江頭老人淚暗滴
萬乘西去關山長公卿相率作降虜草間拜泣如羣羊
當時不識顏平原豈復知有張睢陽孤城落日百戰後
瘦馬食尾人裹瘡男兒意爲忠義死碧血滿地嗟誰藏

賀蘭不斬上方劍英雄有恨何時忘千年海上見祠廟
古苔叢木秋風荒摩挲畫壁塵網裏勇氣燧燧虬髯張
巫歌大招客醅酒忠魂或能來故鄉

謁雙廟

高啓

維昔天寶末君王寵奸虜雄邊委強兵遺患同養虎叛
聞遠西幸骨肉棄榛莽河北二十州義士誰禦侮兩公
起誓衆慟哭告元祖橫身過其衝江淮保安土孤城無
全堞百戰霜月苦力窮援不來嚙齒罵益怒殘兵日饑
疲秋風仆旗鼓男兒不生降一死冠今古故鄉有遺廟
俗祭巫屢舞丹青網塵中爽氣猶可覩嗟今屬喪亂戎
張中丞事實集錄 卷中 七

下寒楚

全宋詩

毒大年

睢陽城中箭如雨百戰疲兵食茶紙將軍力盡孤城危
三十六人同日死當時南入眞男兒嚙指出血空淋漓
賀蘭擁兵坐不救肯與社稷同安危諸君赤心思報國
慷慨殺身全大節死爲厲鬼亦何雄誓欲復仇終滅賊
堂堂廟貌古城隅歲時辟蠶通精誠皇天后土鑒忠義
萬古千年垂令名悲風瀟瀟撼庭樹讀罷窮碑毛髮豎
方今六合最清寧不辨魚麗分守處

雙廟詞

張憲

睢陽戰敗血飄杵力屈猶思爲厲死
元祠前哭一聲
朝食愛姬暮掘鼠唐家宮殿秋草生
二十一陵如掌平
獨遺雙廟門前石日有行人來繫牲

睢陽歎

李東陽

將軍有齒嚼欲碎將軍有背血成淚
生爲將星死爲厲
盡是山川不平氣二人同心金不利
天與一城爲國蔽
強兵坐擁瞋相視孝子忠臣竟誰是
張公令南霽雲責賀蘭進明之語
千載公名亦天意君不見河南節度三日
至十日王叔敗東京陳留人殺賊將尹子奇以城降
至三日張錫救兵

張中丞事實集錄

卷中

三

徐震

猪龍初賜金盆浴一朝化作銜花鹿
銅頭夜走漁陽塵
鼙鼓聲中萬民哭翠華狼狽幸西川
雨霖鈴曲聲凄然
委身報國丈夫事肯令華夏汚腥羶
睢陽張許人中傑
共守孤城盡臣節裏瘡出戰氣崢嶸
飲血登埤心激烈
直欲保障東南安不惜睢民血未乾
陰風晝捲陣雲黑
殺氣直薄江聲寒愛姬肉盡亦不飽
援兵坐視英雄老
四百餘戰空饑羸三十六人委肝腦
精忠大義死猶生
名與日月齊光燦皇明祀典重褒卹
廟前老柏千秋青

余方

中丞古名臣日月昭顏色緬懷凜凜風邈焉邱山隔
彼厲鬼容意妄愚者惑英雄死亦死魂散朽其魄詎持
禍福權千載託巫擊所以廟貌旌欲令後世則堂堂忠
義軀歿世猶血食奸回死復誅鑒戒彰淑慝以貌愚衆
愚無乃巧者力世傳古聖人虛妄猶可惜伏羲謂牛首
畫者皆鬻鬻女媧類蛇形蜿蜓長莫測孔子如俱頭奇
怪此已極遂令希聖徒微貌亂胸臆我思中丞容世遠
不可得惟心契乃心中夜如的的爲著辨貌篇庶拯侵
瀆溺

張中丞事實集錄

卷中

三

漁陽孽胡動鼙鼓羣醜南驅入中土二十四郡皆婦人
俛首甘心作降虜是時乃有張中丞哭拜立元起義兵
犬羊奔突勢難禦牽制扼睢陽城相持大小數百戰
鄰帥全軍渾不援奮髯怒欲吞賊徒飲血登陴礪刀箭
鑿輿出幸別都門社稷安危遠莫聞西望長安不見日
誓將萬死酬君恩胡騎如雲繞城堞危若顛風吹病葉
糧空食盡戰士饑掘鼠羅禽烹愛妾計窮力竭竟莫支
雲崩川潰天爲悲三十六人同就戮顏色不變如平時
當朝贈典褒忠赤畫像凌烟照今昔巍巍雙廟鎮睢陽
更見行祠向無錫無錫山根一脈泉源源湧出神祠前

遠近居人乞靈貺汲之一飲沉痾痊當路具陳奏天子
聖恩特許春秋祀燔炙芬芳黍稷馨馨搃鐘擊鼓陳壘洗
君不見伊昔奸雄背君父骨朽名忘同糞土何如仗節
死義人廟食流芳更千古

古來爲臣須盡忠立朝何必居三公區區縣令宰百里

挺然作事超凡庸天寶年間賊徒熾百二山河都鼎沸
長安轉眼皆腥羶河北居民俱犬彘此時我公忿怒興
誰云鞍馬甘西迎立元廟裏一聲慟兵起雍邱斫賊營
百戰艱關爲首冠重造唐家誅叛亂出奇應變學問高

張中丞事實集錄

卷中

十四

天道人倫同一貫江淮保障維睢陽棄城之議尤心傷
兵餘四百苦堅壁燦然赫赫明綱常城旣危兮力旣竭
臣職盡兮死何惜英雄事去生氣存冊史丹心懸數日

唐家中葉國步屯白鵬幻軀妖紫宸明皇置心林甫腹

朝朝爛醉梨園春胡雛乘輿撼天極百萬貔貅隨指斥
旌旗影蔽日月昏黎民血灑乾坤赤六龍迢遞幸漢中
凝碧管絃聲沸空二十四郡無義士摧眉俛首甘降戎
睢陽張許饒忠烈麾下紛紛擁才傑同心誓欲報君恩
共守孤城拒臊羯虜酋日夕來攻圍隨機應變無停期

推誠待士士爭奮蝨生虎鴟心無疲苦戰鏖兵餘四百
資糧內盡外援絕吞茶噉紙饑自如砧凡腥紅延愛妾
悲風獵獵搖旆旌日落鬼哭狐狸鳴將士饑羸弧矢盡
天狼氣壓孤城領將軍此時奮不屈西望翠華惟痛哭
寧將首隕睢陽衢肯令口污胡雛祿將軍一死非徒然
力能保障江淮全晉水重清西狩返論功寧讓李郭先
遺編縷悉辭何許故人遠寄同璠瑒挑燈讀罷掩卷時
月落花梢號杜宇

李唐逮天寶凶渠悉狎紛紛悖忠義夫君奚獨清片

張中丞事實集錄

卷中

五

言嚇令孤危軍守孤城英雄負大節肯作兒女情從容
一劍死慷慨千古名我來拜君像落日羣山青意氣忽
自快思入秋冥冥吁嗟賀蘭輩寂寞今何成

數辭縣志
烈烈張睢陽百代振孤騫義聲薄天漢建鼓號中原戰
髯拉秋霜神畧吐河源擾擾漁陽騎突兀高城垣百戰
一何勁飲冰不辭寒亭亭得許公結袂障頽瀾良籌雖
屢殲枵腹自相殘河魁黯玉帳旄頭勢正然裂軀酬明
主雄心泣鐵冠吳戈犀甲頓寸刃張空拳飛矢成京峙
揚鋒白晝昏慘淡風塵久天地爲回旋孤城吮血竭刁

斗寂無喧功名生衆忌列障坐相捐忠臣痛至骨嬰頭
鐵鑊煎遺恨浮圖矢不得滅賀蘭唐室紀綱絕清平誰
復論平涼多戰扈西蜀重其關胡獨二公奇慘焉搆斯
難絕絃知節急爲蘭豈避燔束身餌鯁鱷潛授任生竿
孽胡褫精魄不敢裔南轅所以江淮間居然覆栢安士
飽馬騰壘中興實肇端日月洗景曜龍鳳再飛軒常山
有顏君使我涕潺湲卓彼唐三仁碧化萋弘丹吁嗟朝
士愚青蠅點琅玕而胡兩膺子桐貽哲父寃蓋棺猶定
議寧謂塗膏原披帙撫往跡掩袂爲辛酸賤子懷衡杜
凌厲指危弁趨風儼明德慷慨意良殫

張中丞事實集錄

卷中

去

闕名

帝輦西巡六馭勞中原萬戶入腥臊胡塵不阻黃河險
血戰猶懸赤日高力盡睢陽千虎口身輕霄漢一鴻毛
當時鼓角聲難散斷壘悲風日夜號

湯脣績

虎噬鯨吞逆賊來兩京花柳坐成灰廟廊總失經綸策
寰宇俄興俊傑才敵壘計疎徒認矢軍衙令肅恥銜枚
可憐一掬明皇淚不哭睢陽哭馬嵬

成始終

保障江淮第一功名高三十六英雄雲昏戰陣龍蛇合

食盡孤城鼠雀空生欲報君能守節死期厲賊更輸忠
當年射矢惟遺跡恨滿青蒿泣露叢

楊勉

胡騎長驅肆殘賊二十四郡無河北九重天子幸西南
草莽皆知有今日睢陽死節先張巡愛君許遠同殺身
大義精忠貫白日天下古今曾幾人叔冀懷姦兵不救
嚙指男兒卻牛酒城中食盡城不完厲鬼尤當滅餘寇
雙節協忠加六王城南北里荆棘荒于今廟貌遍州治
累朝令典祀事彰活人自古豈茶紙檐頭雀盡地無鼠
三十六人如有靈李翰重來續唐史

張中丞事實集錄

卷中

七

謝廷諒

緬想睢陽道摧殘國士心愁雲四面合悲風白日陰睢
水紆流激影落響逾沉荒丘埋白骨夜月照平林孤禽
號四野噉噉元猿吟行人皆裂昔過客盡露襟矧乃江
淮人保障戢恩深身與城俱陷魂將日共臨折衝樽俎
間閒聽橫笛吟無人椎晉鄙恥自縛陳琳

楊十燧

昔年拜祠下決我上金臺今年祠下拜車馬撲塵來篆
煙疑綺閣花幢耀霞杯氣湧星河亂髯張日月回忠節
誇唐室經綸軼漢才遺像峴山古靈光面面開

過雙忠祠

劉堯誨

力盡援稽將業終登陴猶自悵淮東簡書未授君王託
保障先收李郭功河朔腥風摧弱草乾坤白日照孤忠
未須爲厲酬明主妖禍還知自禁中

張巡

杜濬

觀士觀其敗觀玉觀其碎玉碎必有光士敗必有氣
詠史

人生如一戰勝敗各成名衛霍與張許易地失平生

題張睢陽廟

徐開任

將軍百戰守孤城靜夜唯聞鐵笛聲氣作山河寧惜死
張中丞事實集錄

卷中

六

志吞逆寇不俱生天留半壁扶其主人與完名絕援兵
今日過公祠下拜葦花槐葉不勝情

睢陽歎

姜宸英

陰風淅淅吹城頭劍光疑寒壅不流鼠雀無聲壯士愁
將軍怒氣如龍虬水浸秦煙凍不起吳宮射月芙蓉萎
湘娥啼竹生夜哀況是臣巡妾當死不見擁兵者進明
綺筵拂舞吹鳴箏長淮浪高天吳泣君王飄蕩終無情
南八拔劍血花碧坐令斗酒失顏色行歸誓埽陣雲連
月滿空城露華白

拜張許六王祠

梁清標

名城蹀血共安危道左飛塵賸古祠六矢當年知號令
千秋爲厲見旌旗江淮力障孤軍日睥睨風生苦戰時
每讀昌黎書傳後傷心南八是男兒

張睢陽廟

王士正

不識松滋路中丞何代祠椒蘭紛玉座風雪捲靈旗橫
笛聲猶苦神絃響易悲同堂眞廟食南八是男兒

金口驛拜睢陽張王祠

彭而述

九江砮礮風颼颼武昌上下山亂走扁舟有客自粵來
是日泊船到金口金口廟貌巍長干繫牲石上血痕厚
堂構不知何王殿金碧穹窿篆螭鏤半百黃冠爲我言

張中丞事實集錄

卷中

九

神靈舊是睢陽守天寶之亂羯鼓鳴爾時熒惑犯南斗
河北旣去潼關破長安如失左右手六龍西幸馬嵬危
妖魂血汚玉環朽公繫半壁在東南淮陽保障良非偶
令孤子奇相糾纏彈丸黑子不足取惟公誓死俾孤城
鷓鴣劍作蒼龍吼帳下美人善馬肉雜將雀鼠充軍糗
軍中聞笛賦新詩墨氣潑雲生兩肘援絕糧空城以陷
眼中蟻賊如瘕狗怒鬚蝟磔嘆血紅嚙指斷頭猶不苟
以身障賊蔽江淮太子靈武已稱后張鎬未死李郭生
尺土復爲大唐有天將完節付兩人公也先之許也後
自古興亡若寒暑賣國偷生亦孔醜屈膝蒙面彼何人

我公見之恐欲嘔千年蒹藻楚江濱棟梁自與乾坤壽
里中後學仰高山我今酌公一杯酒

謁睢陽廟

王 攄

祿山陷兩京唐室勢如沸玄元廟一哭義聲震天地誓
死守孤城非云事必濟自覆潼關師乘輿久奔避賊議
圖江淮憑茲一旅制不然鼓而南誰斷其右臂惜乎四
百戰食盡終顛躓城陷逾三日援師鎬始至殺賊雖無
成藉以衛神器從此朔方兵收京功乃遂赫赫精忠祠
允宜祀百世黃巾遍郊垌明季遭傾毀呂侯還舊觀匪
曰窮奇麗偶客梁宋間摠衣拜階屣冕旒坐中央左右
張中丞事實集錄 卷中 三

墮淚 睢陽廟 王式丹 忠

睢陽廟

王式丹

曾披唐史傳遺烈百戰孤城蹟不磨犄角力堪殲寇盜
殞身功已障山河名先李郭懸青簡血竝南雷染碧莎
此日楹間修一拜陣雲邊月想悲歌

繡幔煙沉鐵面寒衝冠餘怒尙桓桓戴天定不借阿孛

斫地還應滅賀蘭

自注鐵鑄賀蘭進明跪階下爲觀者捶擊止存半軀

萬古歲時

尊俎豆九幽靈爽託筵尊卽今燈火傾城市彩繪旌旗

徹夜看

張中丞祠

朱國漢

繡帳煙沉鐵面灰中丞生氣尙嵯巍孤城百戰鼠雀盡
長笛一聲天地哀當日江淮資保障至今號令肅風雷
賀蘭未滅英雄死滾滾波流恨不回

精忠祠

呂謙恒

唐室何多難嗟公當此時睢陽方委敵靈武正揚麾神
將皆入傑鄰城拒義師功成歸李郭千載獨荒祠

張睢陽廟

陳葉筠

喪亂逢天寶江淮障一身死甘爲厲鬼生豈負人倫卞
壺拳還握萇弘血尙新靈旗風捲處猶似掃黃塵

張中丞事實集錄

卷中

三

謁協忠廟

趙良壽

前有李韓後歐陽力排羣議扶綱常二公就死先後異
要與日月同爭光南雷姚閏配廟祀千秋公義無不彰
炳如春秋有聖筆寧煩游夏加贊揚顧我區區不能已
二公恩與江流長若使當時棄城去羯奴乘勝爭跳梁
尙衡進明叔冀輩被驅勢必如羣羊逾淮涉江肆殺戮
遠及宣歙俱罹殃安得奏獻至靈武備給郭李能興唐
二公捍禦誠有力登陴出陣人裏瘡縱使力竭城遂陷
保障功已存南荒至今婦孺頌明德歲時報祀同蒸嘗
二公精英無不在福我壽我民安康況此地與同存亡

魂魄猶應睠宋疆
宋墟若蕘樹鬱蒼環
以睢水流湯湯
靈旗風馬下雲表
三十六人從
翺翔我來瞻
拜焚瓣香
願公作此忠義氣
永迴河汴波
瀾狂使我田田
宅宅樂無央

讀張中丞睢陽遺事歎憤不禁遂書紙尾二首

吳雯

板蕩中原甚江淮有義旌
一身持衆議百戰抗孤城
自合回天地何須計死生
浮圖留半箭遺恨賀蘭兵

廷議真堪痛精英幸不孤
當時猶以食人為過幸賴張建封李翰等持議乃定
只

今留廟食差可慰雄圖象服
衷申國金吾拜亞夫猶嫌

張中丞事實集錄

卷中

三

崇贈卹不到陸家姑

又題一絕

吳雯

博聞默識久知名豈識胸中武庫兵
心鐵更同千鎡利從來難料是書生

張中丞廟

沈德潛

雲旗髣髴下江濱猶見危城百戰身
忍使河山無捍衛要令寇賊識君臣
魂歸朱鳥天常黯血葬萋苴
引草不春萬古南雷同廟食
陣雲邊月想威神

睢陽廟

袁枚

刀上蛾眉喚奈何將軍鄰境尙笙歌
殘兵獨障全淮水

壯士同揮落日戈六射須眉渾不動一城人肉已無多
而今雀鼠空啼竄暮雨靈旗冷薜蘿

張睢陽廟

蔣士銓

月中聞笛倚山樓按劍悲歌凜若秋軍令驚看郎將面
民心知重國家讐百夫忍餓捐生易數齒空存抉視休
厲鬼可爲終殺賊寶刀先斷賀蘭頭

金吾謝表字淋漓主辱當臣致命時餘事讀書能熟誦
傷心出陣尙裁詩生平博雅于嵩見死後勲勞李翰知
三十六人多少恨一聲南八是男兒

詩餘

張中丞事實集錄

卷中

三

六州歌頭

劉過

睢陽舊事說著淚先流男兒漢曾百戰肯俘囚死來休
行闕知何處胡塵暗猶拜望臣力盡孤城陷賊誰收飲
恨就驅血染荒原草地慘天愁口當時有劍不斬賀蘭
頭路隔神州自諸侯問何人爲有遺策猶凜凜氣橫
秋感忠烈人自奮如髣髴見貔貅香火城西道神馭整
轟戈矛風悉宰吹黃葉響颼颼千古人民祈賽中興後
還有人不喚南豐老子傍柳繫吾舟酌酒同游

按龍洲此調本百四十二字今照厲本錄入祇百四
十一字行篋中無書可查姑於愁字下空一字以俟

檢補

沁園春

文天祥

爲子死孝爲臣死忠死又何妨自光岳氣分士無全節
君臣義缺誰負剛腸罵賊睢陽愛君許遠留得聲名萬
古香後來者無二公之操百鍊之鋼 人生翕歔云亡
好烈烈轟轟做一場使當時賣國甘心降虜受人唾罵
安得流芳古廟幽沉遺容儼雅枯木寒鴉幾夕陽郵亭
下有奸雄過此子細思量

和文山題雙廟韻

沁園春

彭孫貽

自古誰無視死如歸死亦何妨恨洗兒妃子暗馳駢足

張中丞事實集錄

卷中

五

白頭太上驚走羊腸老將潼關詞臣凝碧不及睢陽雀
鼠香忠肝照似山河桂影不缺吳剛 淒涼宗社興亡
又經歷金元幾戰場歎徘徊汴水空留雙廟從容柴市
尙有餘芳燕子蘆花水萍風絮何處乾坤著首陽從張
許口無煩炎午委宛商量

賦

雙廟賦

孔武仲

出睢陽兮荒殘蹊草之間覽雙廟之遺蹤兮啟高堂以
縱觀彼巡遠雖異人兮忠壯同發乎心肝英靈超其已
邈兮顧形魄猶凜然昔天寶之不道兮履陸危以爲安

置庸相於廟堂兮養逆臣於邊關胡雛朝發於范陽兮
烽火夕照於長安滄溟橫泄而莫禦兮漂九州以爲瀾
惟梁王之舊都兮俯淮泗之驚湍當兵革之幾消兮矧
壁壘之不完徒死節而相誓兮胥肆力乎艱難以九拒
卻九攻兮顧慮畫之已殫及兵盡而食窮兮雖智勇其
何言腰領橫分於刀机兮支節播棄於邱原生城守而
死廟食兮越至今幾年而望之者恍惕兮過之者盤桓
使懦夫有立志兮此伯夷之所以爲賢如二公之風烈
兮宜聞之者勉旃夫威刑者人之所憚就兮祿利者人
之所喜于矧鯨吞而虎攫兮如思明與祿山獨慨慨以

張中丞事實錄

卷中

三

不懼兮持初志而愈堅眎白刃之來臨兮猶螽雀之過
前洞觀歷世兮鮮或能然以孔光之素貴兮猶折節於
莽賢偷榮耀於一日兮甘醜辱於千年生爲諛臣以終
身兮死爲怯鬼於黃泉聊舉隅以善喻兮非更僕之能
宣我思古人兮徒涕泗之漣漣

孫原貞其

歷睢陽以周覽兮訪忠臣之遺蹤慨城郭之如故兮儼
廟貌之攸崇想開元與天寶兮何後汚而前隆原君心
之致寇兮惟聲色之事穠賜金錢於洗兒兮污雲裳與
花容指赤心於胡腹兮信妖孽之彌縫偉曲江之識鑒

兮豈夷甫之可同豢於菟以遺患兮曾不懲夫犬戎震
金鼓於范陽兮聲徑徹於九重播六龍於巴蜀兮秋槐
落於空宮擅萬乘以靈武兮何繼統之忽忽逸幽井之
失守兮阻殺函而不通何一人之不悟兮致天下之恟
恟顧逆勢之方張兮咸避賊之腥風維二公之憤忠兮
舉義兵以相從擁數千之弱卒兮守要地之孤墉遇破
竹之勢兮期沮折其長衝論天道與人倫兮俾從逆之
懷慆料衆寡之莫敵兮時出奇而一攻或擊賊之不備
兮忽突入其營中雄保障於淮西兮捷聲振於關東奈
糧道之阻絕兮苦餽餉之靡供盡茶紙與雀鼠兮嗟老

張中丞事實集錄

卷中

三

稚之一空愛已割於寵妾兮恩莫保於家僮啖糜下以
肝膽兮諒饑腸之難充衆同心以殉國兮誰復顧於厥
躬終援兵之不至兮力已竭於疲癯望行在而再拜兮
吐詞氣以如虹生莫能以全城兮死爲厲以除兇凜秋
霜於志節兮貫白日於心胸豈一目十行之力兮抑正
氣之獨鍾蕩腥羶以滅迹兮清河朔以銷鋒暨鑿輿之
返正兮亦追悔而旌忠微二公之沮逆兮卽李郭亦難
成收復之功嗚呼覩危石兮驚湍識勁草兮飄風羨六
王兮一體諡爵兮同封雖世代兮更變遇春秋兮潔豐
以死勤事兮人臣之節以禮嚴事兮人心之公俎葵藿

以爲羞兮心曷極觴河水以爲醴兮情何窮陳薄奠兮
仰神明之如在抒素懷兮愧予詞之匪工人之敬兮神
之靈與天地而長終

張中丞事實集錄

卷中

三

之靈與天地而長終

張中丞事實集錄卷中
木以爲醴兮情何窮陳薄奠兮
仰神明之如在抒素懷兮愧予詞之匪工人之敬兮神
之靈與天地而長終

張中丞事實集錄卷下

光山王德茂編

元和陸嵩校

識餘

王明清摭青雜說一則

紹興辛巳冬虜人南侵朝廷遣大軍東屯以遏其衝主將每遣小校四出探望有何兼資者領衆至六合西望忽見一軍自西北來其行甚速號令下寨兼資與所部隱蘆荻中須臾傳令曰荻林中有人否一人曰彼中乃生人與吾無關兼資知其鬼兵也乃詣寨門請見曰某

張中丞事實集錄

卷下

一

宋劉太尉下踏白軍也須臾召入中一人廟坐冠服如天神又四人分坐左右兼資拜問神兵何事西向者曰吾奉天符來助汝太尉也兼資拜請位號西向者曰此天蓬神司主事也我四人張巡許遠雷萬春南霽雲也兼資曰唐書言大王城守凡食三萬餘人果否巡曰有之而實不然所食皆已死者非生人也兼資曰史言張大王殺愛妾許大王殺愛奴以享士然否巡曰非殺也妾見孤城危迫効死自刎許奴亦以憂悸暴死因烹以享士蓋堅士卒心耳兼資顧雷面上一瘢問曰史言將軍面著六箭而止一瘢何也雷曰當時實著六箭而五

著兜鍪虜傳吾面著六箭吾亦當之庶揚名以威虜耳
須臾命酒惟天神者不食良久巡謂兼資曰歸語汝主
將吾奉天符助兵此虜悖逆當取其首以報上帝語訖
命引兼資出及至舊所無復人矣不半月有阜角林之
捷未幾逆亮有龜山之禍皆如其言兼資每與士大夫
言之

海寧縣志一則

唐睢陽太守許遠廟在縣西梁大同二年建後增祀張
中丞巡號雙廟宋紹興八年縣令胡統與邑人禮部侍
郎張九成請於朝增祀南霽雲雷萬春姚闓詔許之皆
張中丞事實集錄 卷下 二

廟祀

崇禎長編一則

徽州監生江旭奇因思陵幸學疏進孝經疏義竝請祀
諸葛亮張巡岳飛於文廟章下所司 兼資與士大夫
沈欽韓韓文考證四則

方輿紀要跳石鎮在夔州府巫山縣西北唐雷萬春爲
縣之跳石人亦曰跳石鄉范石湖集雷萬春墓在南京
城南環以小牆榜曰忠勇雷公之墓按南京卽睢陽

通鑑載睢陽士卒死傷之餘纔六百人是時許叔冀在
譙郡尙衡在彭城賀蘭進明在臨淮皆擁兵不救河南
節度張鎬聞圍急倍道兼進檄浙東西淮南北海諸節
度及譙郡太守閻邱曉使共救之曉素傲很不受鎬命
比鎬至睢陽已陷三日鎬召曉杖殺之按鎬於八月以
宰相兼節制是時河洛尙爲賊據鎬之赴河南當出武
關從襄陽沿汝光等州故道遠不及救

寰宇記張巡許遠南霽雲廟在宋州南七里大歷二年
有敕云云按自貞元後迄唐末赦書條流求忠臣後無
不及三公者會要四十五建中元年九月史館奏至德已

張中丞事實錄

卷下

三

來功臣張巡南霽雲在第一等許遠在第二等

新書南霽雲雷萬春外別將二十有五其後皆死巡難
四人逸其姓名按全唐詩小傳張汴滑人與張巡同守
睢陽城陷死難者三十六人汴其一也宋汪應辰作廟
記云初顯於湖湘間後及江右之玉山皆祀之一統志
張汴廟在廣信府鉛山縣治西

原編雜錄三則

宋元豐三年始封嘉應侯政和三年九月勅封靈佑侯
政和六年十月封佑順顯靈公宣和七年賜廟額加封
昭烈二字建炎二年封忠靖王紹興十七年封妻協惠

夫人紹興二十二年封忠靖威顯王隆興元年封忠靖威顯靈佑王乾道七年封忠靖威顯靈佑英濟王

張巡許遠俱唐中宗景龍三年己酉生

張中丞墓在歸德府城北

附錄

唐肅宗至德三載勅

銀壹挺米貳碩綾壹疋右許令威三年把守日夜辛勤

茲件物聊充優賞可收領遣此不具使委曲付許令威

子為歙州別駕唐代宗授南霽雲子承嗣歙州別駕詔

往者大盜亂華梁宋偏罹其害危城絕援析骸累月南

張中丞事實集錄

卷下

四

霽雲貞心壯節凌邁賊洪殞命敵場凜然生氣宜以其

子為歙州別駕

唐故特進贈開府儀同三司揚州大都督南府君

贈壹廟碑

柳宗元

急病讓夷義之先圖國忘死貞之大利合而動乃市賈

之相求恩加而感則報施之常道睢陽所以不階王命

橫絕凶威超千祀而挺生奮百代而特立者也時維南

公天與拳勇神資機智藝窮百中豪出千人不遇興詞

鬱龐眉之都尉數奇見惜挫猿臂之將軍天寶末寇劇

憑陵墮突河華天旋虧斗極之位地圯損狐狸之穴親

賢在庭子駿陳謩以佐命元老用武夷甫委師而勸進
惟公與南陽張公巡高陽許公遠義氣懸合訐謨大同
誓鳩武旅以遏橫潰裂裳而千里來應左袒而一呼皆
至柱厲不知而死難狼暉見黜而奔師忠謀朗然萬夫
齊力公以推讓且專奮擊爲馬軍兵馬使出戰則羣校
同疆入守而百雄齊固初據雍邱謂非要害將俛障江
淮之臣庶通南北之奏復拔我義類扼於睢陽前後捕
斬要遮兇氣連沮漢兵已絕守疏勒而彌堅虜騎雖強
頓盱眙而不進賊徒乃棄疾於我悉衆合圍技雖窮於
九攻志益專於三板偪陽懸布之勁汧城鑿穴之奇息

張中丞事實集錄

卷下

五

意牽羊羞鄭師之大臨甘心易子鄙宋臣之病告諸侯
環顧而莫救國命阻絕而無歸以有盡之疲入敵無已
之強寇公乃躍馬潰圍馳出萬衆抵賀蘭進明乞師進
明乃張樂侑食以好聘待之公曰敝邑父子相食而君
辱以燕禮獨何心與乃自噬其指曰噉此足矣遂勸而
返卽死孤城首碎秦庭終惜無衣之賦身離楚野徒傷
帶劍之辭至德二載十月城陷遇害無傳燮之歎息有
周苛之慷慨聞義能徙果其初心烈士抗辭痛臧洪之
同日直臣致憤惜蔡恭於累旬朝廷加贈特進揚州大
都督定功爲第一等與張氏許氏竝立廟睢陽歲時致

祭男在襁褓皆受顯秩賜之土田葬刻鮑信之形陵圖
龐德之狀納官其子見句踐之心羽林字孤知孝武之
志舉門關於周典徵印綬於漢儀王猷以光寵錫斯備
於戲睢陽之事不惟以能死爲勇善守爲功所以出奇
以恥敵立謹以怒寇俾其專力於東南去備於西北力
專則堅城必陷備去則天討可行是故卽城陷之辰爲
克敵之日世徒知力保於江淮而不知功靖乎醜虜論
者或未之思歎公諱霽雲范陽人有子曰承嗣七歲爲
婺州別駕賜緋魚袋歷刺施涪二州服忠思孝無替負
荷懼祠宇久遠音德不形願斲堅石假祠紀美惟公信

張中丞事實集鈔

卷下

六

以許其友剛以固其心仁以殘其肌勇以振其氣忠以
摧其敵烈以死其事出乎內者合乎貞行乎外者貫於
義是其所以奮百代而超千祀者矣其志不亦宜乎廟
貌斯存碑表攸託洛陽城下思鄉之夢儻來麒麟閣中
卽圖之詞可繼銘曰貞以圖國義惟急病臨難忘身見
危致命漢寵死事周崇死政烈烈南公忠出其性控扼
地利奮揚兵柄東護吳楚西臨周鄭婪婪羣兇害氣彌
盛長虵封豕踴躍不定屹彼睢陽制其要領橫潰不流
疾風斯勁梯衝外舞缶穴中偵鈴馬非艱析骸猶競浩
浩烈士不聞濟師兵食殲馬守逾三時公奮其勇單車

載馳投軀無告噬指而歸力窮就執猶抗其辭圭璧可
碎堅貞不虧寇力東盡兇威西慝孤城旣拔渠魁就戮
雷霆之誅由我而速巢穴之固由我而覆江淮湖羣
生咸育倬焉勳烈孰與齊躅天子震悼陟是元功旌褒
有加命秩斯崇位尊九牧禮視三公建茲祠宇式是形
容牲牢伊碩黍稷伊豐虔虔孝嗣望慕無窮刊碑河滸
萬古英風

祭陸夫人文

無名氏

維年月日某官某以清酌庶羞之奠告於唐烈婦陸家
夫人張氏之神天寶之亂張中丞以真源一令起兵討

張中丞事實錄

卷下

七

賊歷雍邱而睢陽與許公合共守孤城卒死國難神與
中丞爲同氣依難弟於軍中蓋嘗陳機事以說統戎躬
補縫以拊士卒又先諸公以死一家姊弟相繼盡節忠
義信有種乎彼有男兒而爲不義屈者視夫人當愧死
地下矣惜也不列祀典謹附祭於張國公之右尙饗

雷萬春墓

范成大

九隕元身不隕名言言千載氣如生欲知忠信行蠻貊
過墓胡兒下馬行

南將軍

東盡兇威西慝孤城旣拔渠魁就戮

王綸

一死於心果不難曹柯心在炳如丹空畱矢石浮圖上

誰不教渠滅賀蘭

范夢龍

斷指抽刀激進明可憐終不發援兵危城難守身遭執
授命猶從主將行

南霽雲

屠隆

桓桓南將軍徵兵下泗州城上黃雲起睢水寒不流斷
指驚座客西風厲高秋賀蘭竟何人端居擁貔貅

南將軍廟行

王士正

范陽戰鼓如轟雷東都已破潼關開山東大半爲賊守
常山平原安在哉睢陽獨遏江淮勢義激諸軍動天地

張中丞事實集錄

卷下

八

時危戰苦陣雲深裂背不見官軍至誰歟健者南將軍
包胥一哭通風雲抽矢誓師已慷慨拔劍墮指何磷岫
賀蘭未滅將軍死嗚呼南八眞男子中丞侍郎姚公同閭也
日亡碧血爛斑照青史淮山峩峩淮水深廟門遙對青
楓林行人下馬照秋色一曲淋鈴萬古心

詠南將軍事一絕

吳雯

嗚咽臨淮幾乞師廣張聲樂復何爲燈前難忍千秋淚
灑到當年斷指時

南將軍祠

馮廷樾

祿兒煽禍漁陽亂三郎西上劍門棧睢陽太守鬚怒張

死守孤城身百戰將軍仗義乞師來慷慨不預賀蘭宴
斷指墮地血淋漓磚裂浮屠沒半箭南八故是奇男兒
烈節堂堂勒史傳至今祠廟頓邱北遺像崢嶸目如電
山爲含憤水含怒蜀魄哀哀啼深院古來不乏艱危時
世上幾許偷生漢回看二十四郡人降幡徧豎河北岸

補遺

雙廟

在南京北門外張巡許遠廟也
世稱雙廟南京人呼爲雙王廟

范成大

平地孤城寇若林兩公猶解障妖祲大梁襟帶洪河險
誰遣神州陸地沉

題江陰睢陽廟

陳玉璣

張中丞事實集錄

卷下

九

突兀睢陽廟乃在江陰城幽光碎金碧肅肅來英靈唐
家再造力江淮公所平公看古道間白骨紛縱橫安得
古董狐一一存其名

謁張中丞許侍御雙忠祠

李調元

從來圍城攻既久析骸易子古亦有不聞食及三萬人
人肉食盡仍死守死守者誰許與張戮力同心保睢陽
已將愛妾饗軍士更無雀鼠充饑腸氣吞胡虜聲碎齒
望斷官軍血裂背可憐南八真男兒恨煞進明仇未洗
吁嗟南八不須悲坐視不救誠有之當年執政多左袒
莫恨進明恨房琯

中 魯港謁張睢陽先生祠

汪履成

一矢依然志賀蘭誰將祠廟鎮江干生前戰守心彌苦
死後馨香鼻亦酸白日靈鼉扶殿陛青天古木捧衣冠
如何太守無遺像重檢昌黎雜著看

張中丞事實集錄

卷下

十

吹回大卒難謀計車無昌黎雜著香
天翁響香鼻亦酸白日靈鼉扶殿陛青天古木捧衣冠
一夫對愁志買蘭誰將祠廟鎮江干生前戰守心彌苦
張中丞事實集錄卷下 主前 玉氣苑

跋

睢陽城破中丞死三十六人生共恥駢肩就戮古所難
公之所難不在此維公慟哭來睢城羯胡已陷東西京
乘輿播遷未知所二十四郡降爭迎當時公卽棄城走
此心豈便朝廷負無睢陽是無江淮一步何容更退守
可憐坐困九月餘大小百戰晝夜俱鼠雀食盡繼以妾
援兵竟絕徒捐軀全師嘆息此誰擁頃刻城頭賊騰踊
說公往事知公難豈獨臨危一呼勇公今相去逾千秋
遺文佚事誰能求光山明府抱深意正氣欲藉公常留
我讀此集尙公恨廟貌巍峩久斯郡何不爲瘡殺鬼夷

張中丞事實集錄

跋

忠義人間令知奮

亥坪先生屬校張中丞事實集錄有感於昨年之事
率題長句以代跋語時道光二十三年癸卯四月

浣元和陸嵩謹識

四勸坐困此日綽大小百戰晝夜俱鼠雀食盡繼以妾
五心豈便朝廷負無睢陽是無江淮一步何容更退守
乘輿播遷未知所二十四郡降爭迎當時公卽棄城走
此心豈便朝廷負無睢陽是無江淮一步何容更退守
公之所難不在此維公慟哭來睢城羯胡已陷東西京
乘輿播遷未知所二十四郡降爭迎當時公卽棄城走

跋

跋

一

300
1

